

# YÒZEFÙ ÛTWILANGANA

## NE BÂNÀ BÀÀBÒ



...ne díyì dikùmbàne ndambù bwà kwakula kakesè. Ne ndi ne muminu ùnsaama kùkaadi ndambu wa matùkù. Nènku—nènku, mu dindà emu, ndi ne cimpumpu cyà cibì be; mbyenzè ànu bu ne, musangu wònsò wúndi ndwa, mu mùshindù kampànda, ànu mu cibandabanda eci. Makèèlèlà awu mwva nyiikilangana ne bàmwè bàà ku bânà bèètù patùvwà kuulu ku lusongo lwà tukùnàkùnà atu mu New Albany mwàmwa, ne mémè kupwekesha mèsù lwà kwinshi eku. Mémè kwamba ne: “Ki kabingila nkókò aku, mwaba awu mene.” Cìdì ànu dibungi dilembèlèle mwab’ewu, ne dyenzè bu dibwikila cimenga cijimà. Nènku ndi ànu mbwela mu nyùngulukilu amu, ànu pàndì mudítwemù, byàbangì, nwamònu’s, cyàkàbìdì, pàndì ànu mbwela apu. Kaa, bikèngela ngàngatè nntèntà nye ku lusongo lwà kakùnà aku, mwaba kampànda, ne ngaasèmu citùùdilu. Bwalu, tudi ànu beena lwendu ne beenyi, nànsha bìshi, kí mmwómò anyì? “Twenda tukèbangana ne Cimenga cìdì Mwibaki ne Mwenji mwikàle Nzambì.” Ki citùdì banangè ncyòci aci. Mpindyewu tudi ne ndambù wa . . .

2 Ànu kumpàla kwà kubanga disangisha, mu dindà emu, ne kumpàla kwà dilongesha dyà kàlaasà kàà Dyàlumingu, tudi ne dī—dilambula dyà bânà. Nènku mwanèètù wa balùme ùdì ne mwànà mukèsè udiyè muswè kulàmbula kùdì Mukalenge; mwanèètù wa balùme, mu mubidi emu. Ne pàmwàpa, bàmwè bàà kunùdì nwènu baamaamù ne baataatù kaaba aka nudi ne mwànà mukèsè wa kulàmbula. Mpindyewu, misangu yàbùngì, mu Bible . . .

3 Nènku tudi ne makòsoloka mavulè mu maèkèleeziyà, bwalu bwà malongesha mashiilàngàne pa dibàtiiza dyà bânà bakesè, ne bikwàbò. Nènku, mpindyewu, aba bàdì bàbàngata, ne bàbàmyamina màyi pa mutù bwà dibàtiiza dyà bânà, abi’s mbilààdile ku mùshindù unùdì baswè kubàlàmbula. Kàdì, cintu cyònsò mu kaabujimà cìdì cikoobeka ku bwalu bùmwèpelè, dilàmbùdiibwa kùdì Mukalenge. Nwamònu anyì? Nènku mpindyewu . . .

4 Bwalu, mwànà wa mu dibòko awu, bwà mpèkaatù, yèyè kèna nànsha ne umwe to. Yesù wàkafwà bwà kuumusha mpèkaatù yà bàà pa buloba. Ne mwànà wa mu dibòkò awu kí mmwenzè mpèkaatù to, yèyè ùvwà ànu . . . N’ngènzàmpèkaatù. Mmulela mu mpèkaatù. Kàdì pàakafwà Kilistò ku Kàlvariyo, Yèyè wàkuumusha mpèkaatù yà bàà pa buloba, ne mwànà wa mu

dibòkò kènà ne bwalu nànsha to too ne ku cikondo cyà dimanya. Nènku mwànà mukesè wa mu dibòkò kanà yònsò ewu, baledi nànsha biikàle babì bàà bìshi, pàdiye ànu ne wáfù, ùyaaya buludì mu mabòkò à Kilistò, nwamònu's, bwalu Yèyè wàkafuta mushinga. Nànsha byòbì ne mmwànà mulela mu mpèkaatù, ne ku masandi anyi ní ncinyi cyònsò, kacyèna ne cidici cishintulula to nànsha kakesè, mwànà wa mu dibòkò awu mmukùbìibwe kùdi Kilistò bwalu Wàkafwà bwà kuumusha mpèkaatù yà bàà pa buloba. Kàdi pàdi—kàdi pàdiye ùkola ndambù mpindyewu, mu mùshindù wà wènza mpèkaatù yèndè nkààyèndè, dìbà adi bikèngela ànyingalalè bwà cidìye mwènze aci. Kàdi kènà ne mpèkaatù yèndè nkààyèndè pàdiye kàyi mukolè mukùmbàne bwà kwenza mpèkaatù to, bwà kumaanya cidì cìmpè ne cibi. Kàdi, mpindyewu, tutu misangu yònsò ànu tuteeta bwà kushààla pabwìpì ne Bible pa maalu aa, bu mutùdi bamanyè.

<sup>5</sup> Mpindyewu, kakwènakù Mufùndù nànsha wùmwe mu Bible, bwà dimyaminangana dyà màyi to. Cintu cìmwèpelè citùdi tusangana. . . Anyi, kakwèna dibàtiiza dyà bânà bakesè mu Bible to, nànsha mu mmwènkelu kaayi. Mwaba wùmwepelè wutùdiku mwà kupeta, mmufùnda kaaba aka mu Mifùndù, wà ne Yè- . . . “Bàakalwa ne bânà bakesè kùdi Yesù, ne Yèyè wàkabàmbula mu mabòkò Èndè ne kubàbènesha, ne kwamba ne: ‘Lekèlaayi bânà bakesè balwe Kùndi, kanùbàkandiki to, bwalu Bukalenge bwà mu Dyulu mbwa aba bàdi nànku.’”

<sup>6</sup> Mpindyewu, aci, mpindyewu, mùdiYe muyè kùdi Nzambi, ne musòmbe ku dyàbalùme, leelù ewu, mu mubidi Wèndè wà musunya, ne pa Nkwasa wa butùmbi wa Nzambi, ne Yèyè mmutùme Èkèleeziyà Wèndè ne mudimu bwà kuya pa buloba bujimà ne kutùngunuka ne byenzedi byàkabangàYe pànwàpa pàvwàYe pànu pa buloba, mbwena kwamba ne, kuyiisha Èvànjeeliyò, kwondopa babèèdi, ne kulambula bânà, ne bikwàbò, ki bwà cinyi bananga bèètù mbalòmbiibwe bwà kulwa ne bânà bààbò bakesè abu kùdi Mukalenge, pa kubàpèèsha mpaasàtà wabò, mu mabòkò èndè, ne yèyè ùdi ùbàjuula, ku diitabuuja, kùdi Kilistò, ne ùlòmba Kilistò bwà kubàbènesha.

<sup>7</sup> Nènku, dìbà adi, wèwè ne mwànà mukesè ùdi—ùdi kùyì mwànji kulambula kùdi Mukalenge to, ne wèwè muswè kulwa nendè pàdi mwanèètù wa bakàji wimba cisanji cyà pyànò apu ne: *Bwelàayi Naabò*, nènku tudi mwà kuwimba. Mbanganyì bàdi bamanyè musambu wà kale awu ne: *Bwelàayi Naabò?* Nènku abi mbìmpè. Mpindyewu, Mukalenge ne Mandamu Henry Branham nebàtwale mwanààbò mukesè awu. Ne yònsò wa ku bakwàbò udi ne bânà bàdiye muswè kutwàla awu, èè, bàtwàlaayi ànu pa dìbà edi mpindyewu bwà dilambula. Èyo.

Bwelàayi naabò, bwelàayi naabò,  
 Bwelàayi naabò nuumukila mu madimi à  
 bwambi à mpèkaatù;  
 Bwelàayi naabò, bwelàayi naabò, (. . . ? . . .)

8 Ndi muswè kunuleejaku mukwàbò Branham wa kânà, Mary Ella Branham wa kânà. Mmwânà wa bakàji wa mwanèètù wa balùme ne mukàjèndè munanga. Bwà ne, mbalwè kumpàla eku mu dindà emu, ku èkèleeziyà, bwà kulàmbula mwânà mukesè ewu, mwoyi, kumwaluja kùdi Nzambì, Yèyè wakabàpèeshayè awu.

Mpindyewu twinyikàayi mitù yètù paanshì bwà katanci kakesè cyaanàà.

9 Taatù wetù wa mu Dyulu wa musànggeelu, bu mùdìbo biimàne kaaba aka kumpàlâ kwànyi leelù ewu, mwanèètù wa balùme sungasunga mu mubidi emu, ne mukàjèndè-musèla, mukàjèndè. Nènku Wèwè nyèwù mutàmbe kubènesha mèkù àbò ne Mary Ella wa kânà ewu, bwà kubàpèesha disànka mu matùkù àbò àcilwalwà. Ndi nKwela twasàkidila bwà divùluka dyàbò dyà kùdi mwânà mufùmìne, ne kumutwàla leelù ewu ku èkèleeziyà, bwà bààmòna mwà kumuleeja Kùdi. Nènku ndi mpindyewu nKupèesha mwânà ewu, mu mabòkò à diitabuuja, ne ndòmba bwà Ûbeneshè mwânà ùndi mukwàte ewu. Nènku swàkù bwà ìkalè ne mwoyi ne àkolè. Ne bu Yesù mwà kunènga, swàkù bwà ìkalè musadidi Webè, bwà kuKusadila.

10 Bèneshàku tatwèndè ne mamwèndè. Nènku, Nzambì, enzàku bwà Nyumà Mwímpè Webè àbàlombòlè mu lwendu lwà mwoyi. Nènku mu dīngà ditùkù, pààjikà lwendu lwà bwenyi elu pa buloba ebu, swàkù bwà dīkù dīnène dyònsò dyàdisangisha mu Butùmbi. Enzàku nàнку, Mukalenge. Too ne ku diine dībà adi, swàkù bwà mwânà ewu àkolè ne abèneshiibwè kùdi Nzambì, ìkalè ne mubidi tumatuma ne makàndà, ne ìkalè cileejilu cyà bukàji mu matùkù èndè àcilwalwà. Nènku netùKupè butùmbi. Bwalu tudi tuKuleeja mwânà wa mu dibòkò ewu mpindyewu, mu Dīnà dyà Yesù Kilistò, Mwân'Èbè. Amen.

11 Nènku ndi nkwalujilayè. Nzambì ànùbèneshe. Mukalenge ànùbèneshe. Èyo.

Bivùlukilu byà mushinga mukolè, mùshindù  
ùdìbi bishààla,  
Bitùmiibwe ku mwaba kampànda ku musùkà  
wànyi;  
Bu mùdìbi bishààla, dībà dyònsò ànu pabwīpi  
naanyi,  
Myandà yà mushinga mukolè, yà cijila yidi  
yidyàdija.

12 Mùshindù mwinè wutùdì tutùmbisha Mukalenge wetù munanga bwà bânà bakesè bwònsò's wè! Nudi bamanyè's, bìdi bimwènèka byà pabwàbì mùshindù utùvwà musangu kampànda bânà mùshindù awu. Nènku kùdi cintu kampànda bwà mwânà wa mu dibòkò udi kàyi ne didìswa ewu, ùtàmba kufwa luse ne mutàmbe kwikalà wa musànggeelu. Nànsha Mukalenge wetù mene wàkabàfila bu cileejilu, wàmba ne: "Ànu wèwè

mukùdìmùne mucìma ne mwikàle bu umwe wa ku bâna bakesè aba,” bàà bupòle be.

<sup>13</sup> Ndi mumòne Joseph wanyì mutekète ewu, mùshindù ùdiye mufike mu cikondo cyà kubwela mu bintu byònsò, kàdi mamwëndè neikalè ànu ne cyà kumulongolola. Ne ùdi mwà kutuula mwendù, anyì ní ncinyì cikwàbò cyònsò, ànu bwà kucyùmwa mùdici cidituuta paanshì. Nènku dībā adi mamwëndè yèyè mumunàngùle dipi, anyì cintu kampànda, neàmbande lubilu mu mabòkò èndè ne kumujìngila mabòkò ku nshìngù mùshindù ewu.

<sup>14</sup> Bidi bikèngela bwà twètù kufwìdiibwa luse, kùdì muntu ne mukwëndè, bu bâna bakesè aba, bwà kubwela mu Bukalenge.

<sup>15</sup> Mpindyewu, tudi twela Nzambi twasàkidila bwà mwàna mukesè wa mu dibòkò ewu, Māriyà Ella Branham wa kàna ewu. Nènku swàkù bwà ikalè ne mwoyi, ne àkolè ne àtantè, ne ikalè musadidi wa Mukalenge. Nènku swàkù bwà mu nzùbu mùdiye mukolèshìibwe ikale nzùbu wa beena Kilistò, nàнку awu neikale mwà kukola mu dibandila dyà Kilistò.

<sup>16</sup> Nènku mpindyewu tudi... (Twasàkidila, Mwanèètù wa bakàjì Gertie.) Ne mpindyewu bâna bakesè aba mbangàte kaaba kààbò mu cibambalu cyà cilongelu cyà kàlaasà kàà Dyàlumingu.

<sup>17</sup> Ne mpaasàtà ùvwa—ùvwa mufile mamanyisha à mwaba wìkala masangisha leelù ewu, ne mààlabà, mààlabà dilòòlò. Mu mapingaja emu, nebìikalè... bwà ku dyànyì dimanya, kakwènakù masangisha makàngula to, ànu byòbì biikàle yimwè yà ku èkèleeziyà mikesè yà mu Louisville, yitùdi biibidilàngàne naayi, Mwanèètù Durban ne bààbùngì bàà kùdibo. Ngèèla meejì ne bàdi ne disangisha dyà mu dyàlumingu mu mapingaja.

<sup>18</sup> Ndi ne mabiikila àbùngì. Bantu bààbùngì bàdi ku tubàdi, ne bikwàbò, bwà kubàsambidila, bàdi bàsaama ne bàdi mu ntàtu.

<sup>19</sup> Masangisha àànyì àdì àlondà neikalè ku Cleveland, mu Tennessee, kubangila ku diitànù dilòòlò dyàlondà, mu diitànù too ne ku dyàlumingu.

<sup>20</sup> Ne pashìshe netwàlukilè buludì kumbèlu, ne netùye ku South Bend, mu Indiana, nènku munda mwà malòòlò àbìdì kuntwaku bwà dilambula dyà ntempèlu; Mwanèètù R. E. S. Toms wa ku Saskatoon, mu Saskatchewan.

<sup>21</sup> Ne pashìshe, kuumukila aku, tuyààya ku Sturgis, mu Michigan, bwà malòòlò àbìdì à disangisha ku Sturgis, mu Michigan.

<sup>22</sup> Ne pashìshe tuya ku Lima, mu Ohio, kùdì ba-Baptistes, mu Nzùbu wa Civùlukilu mu—mu Lima, mu Ohio. Àdì àtwàdija mu ditùkù dyà makumi àbìdì ne diisàtù dyà ngondo wa cyongo, too ne ku dyà makumi àbìdì ne mwandamutekète.

23 Ne pashiishe, kuumukila apu, tuyààya ku Côte Ouest dîbà adi, ku masangisha manène mu Californie ne mu Arizona. Nwàtùsambidilaayikù. Mààlabà . . .

24 Dilòòlò edi, pa dîbà mwandamutekète ne tusunsa makumi àsatù, nekwikale masangisha à butangadiki mu tabernacle emu, ne bantu bwònsò mbabiikidiibwe.

25 Nènku mààlabà dilòòlò, ndi ne cyà . . . Nényiishe kwà Mwanèètù Cauble, mu masangisha èndè—èndè à mundankùlù à ncishà. Nèngiikalè . . . Cyànyì citùpà cìdi cibanga pa dîbà citèemà, too ne pa dîbà citèemà ne tusunsa makumi àsatù.

26 Pashiishe nèngàalukilè ku tabernacle eku, kwikalà masangisha mamananè kubanga, ne baampaasàtà benyi ne bambi biikala mwab'ewu, bwà kwikala ne cyà dyanza mu masangisha à mààlabà dilòòlò. Nwènù bwònsò baswè kutèeleja bampaasàtà bàakula ne bamba patòòke mishindù yàbò yà dinwàmbila mùshindù wa kubanga cidimu cipyacìpyà, ne cyà dyanza, mòna's, bwà ku mmwènu wa mu Mifundu, mòna's, ikàlaayi batwishiibwe bwà kwikala apa mààlabà dilòòlò. Masangisha àdi àbanga pa dîbà mwandamutekète ne tusunsa makumi àsatù, bu pa ciibidilu, pa dîbà mwandamutekète ne tusunsa makumi àsatù. Ne neàtúngunuke too ne ku mundankùlù, mu dyàlumingu dilòòlò, ne pashiishe . . . anyì, mu dimwè dilòòlò's wè, èyo. Pashiishe, paanyimà pàà dîbà citèemà jaajaaja, paanyimà pàà mèmè mumanè kujikija ne Mwanèètù Cauble, Nèngàalukile buludi apa ku tabernacle, bwà kubanga, ne míngà misangu, pàmwàpa, kujikija diyiisha dîndì njinga kubanga mu dîndà emu edi. Anyì, ndi . . . bìdi ànu bu bingangata ntàntà mule.

27 Ntu ne lujòòkò, nudi bamanyè's, kàdi ndi muswè bwà Dyòdi kufikaku ne ku cishimikidi cyà mùshindù mujaalàme. Pa nàнку, kabyèna ànu bikèngela bwà kuCitangalaja mwaba nànsha wùmwè to. Ndi muswè bwà Cìshaalè mwaba awu, ne cìkolè ne citantè bwà Mukalenge.

28 Mpindyewu, kùdi mwa—mwambi kaaba aka mu dîndà emu, mwambi wa citende udi ne cyà kwikala, ngèela meeji, mu Cilààla-beenyi cyà Bel Air. Ndi ne cyà kumònanngana nendè pa dîbà ibìdi anyì isàtù, mu mapingaja emu. Nènku, anyì, ùkaadimù anyì, nànsha nàнку? Bu mùdibi ne, ndi mupwè ne mwoyi dìnà dyà mwanèètù awu. Mmufùmìne ku Tennessee. Wàkondopiibwa ku mwongo mucibùlùke, mu disangisha dyànyì, ne kubwela mu mudimu wà bwambi. Mwanèètù wa balùme ewu, *mwaba awu*. Èyo. Abi's mbìmpè. Aci's nku . . . Aci's ncyà ku . . . Bivwa pa dîbà ibìdi anyì isàtù, mmwòmò anyì? Ndi . . . [Mwanèètù wa balùme awu ùdi wàmba ne: "Ìsàtù."—Muf.] Ìsàtù; dîbà isàtù too ne ku dîbà inaayi. Èyo.

29 Ne pashiishe kùdi mwambi mukwàbò, ncyèna mumanyè ní ùkaadipù anyì to. Ngwa mu Nord wa Colombie-Britannique. Dìngà ditukù, pàmvwà nteeta bwà kuswika bibuta, pa mpundà

kampànda ayi, ngèèla meeji, anyi cintu kampànda; mvwa ne mwevu *mòna* bule, mvwa ngààlukila ku lwendu lwà bulembi; kukaadi bidimu bûngi cyakaa. Muntu kampànda kulwayè tàmakàtàmàkà e kwamba ne: “Kî ngwèwè Mwanèètù Branham anyi?”

<sup>30</sup> Mvwa mutwilàngàne ne nsongààkàjì kampànda wa citende mu màkàjiiyì, wàmba ne kacya kàvwakù mwanjì kumòna mukà- . . . anyi—anyì kacya kàvwakù mwanjì kumòna cimenga aci, cimenga cinène to. Nènku ndi ngèèla meeji ne ùvwa kule ne cimenga aci mu kilòmèètà nkàmà yisambombò ne makumi ànaayi anyi nkàmà mwandamukùlù, pàmwápa mipìte apu, nkàmà yà kilòmèètà ne ku njila wa bètò, mu kaacimenga kakesè kàdibo bàbìikila ne East Pines. Ngèèla meeji ne kùdi màkàjiiyì àmwèpelè kuntwaku. Lwà mu ndekeelu amu, ke mwàkuumukila babàke aba.

<sup>31</sup> Nènku bàdi mu njila batàngìle ku Cuba. Ndi ndikonka ní bàdi kaaba aka mu dindà emu, èyowà's, bàà ku nord wa Colombie-Britannique. *Mwab'ewu* mene. Èè, mwoyi wèbè wùbèneshiibwè, mwanèètù. Tudi ne disànkà dyà kwikalakù neenù ne mukàjèèbè, ba-mpandanjila, mu lwendu. Mumbiikidile, mu dindà emu, ku—ku Cilààla-beenyi cyà Star. Mukalenge ànùbènèshè. Ndi mumanyè ne bânà beètù bwònsò nebìikalè ne disànkà dyà kubàlabula ku cyanza. Ne muntu udi, ku fòtò nàka, mufwànyine kunjingulula ne mwevu wònsò ùmvwà naawù awu, ùdi ne bujinguludi bwìmpè. Mbìmpè be.

<sup>32</sup> Nènku bàvwa bantu bàà bukitù, mu njila wa dibànda kuntwaku kùvwà kakùyì bantu, nangananga to, lwà kuulu kwà East Pines. Nènku bìvwa mwà kwikala, bìvwa ne cyà kwikala bikolè bwà kwamba mùshindù ùdi bantu bakesè kutwaku mu ditùnga amu, kàdi, nànsha nànkù, bàvwa kuntwaku bu bampàndànjlà, bàteeta bwà kwenza cintu kampànda bwà butùmbi bwà Nzambi. Ncyà bushùwà ne ndi mbànyisha ne mwoyi wànyì wònsò. Ndi mumanye ne nwènù bònsò nutu baswe kubàlabula ku cyanza ne kuumvwa maalù à ditùnga dinène dyà ku nord-ouest aku. Nènku, mpindyewu, díbà adi. . .

<sup>33</sup> Ngèèla meeji ne mamwèndè wa Màndàmù Roberson ùcidi ànu ùsaama bikolè menemene. Bikèngela nkamumòne mu mapingaja emu, ne nwavùlukaayi bwà kumusambidila. Aci's neciikalè. . . Ne pashiishe, bu Mukalenge mwà kwanyisha, nèngààlukilè cyàkàbìdi kaaba aka pa díbà mwandamutekète ne tusunsa makùmi àsàtù dilòòlò edi. Ngèèla meeji ne baa McSpaddin mbaalùkile kuntwaku, bu mutùyaaya kadyà naabò mundamuunya emu lwà pa díbà isambòmbò jaajaaja, ne kutupèsha díbà dyà kwalukila.

<sup>34</sup> Ne pashiishe tudi baswè kukùmbula Màndàmù Burns. Mwanèètù Burns ùdi munda emu, mu dindà emu anyi? Yèyè ùdi kaaba aka anyi? Èyowà. Ncìvwa mukumòne to, Mwanèètù Burns,

paùvwà musòmbe apu. Mwanèètù wa bakàjì Burns ùdi ùsaama bikolè, ùsaama bikolè be.

<sup>35</sup> Nènku mvwa muyè dilòòlò adi kuntwaku, bwà kumumòna, ne ùdi ùsaama bikolè be. Ne musùukà wà bukitù ki cidiye. Nènku tudi baswè bwà muntu ne muntu ikale mukwatè Nzambi díbà dyònsò, bwalu, kucyàmba patòòke mùshindù ewu, nciyì mumanyè ne nganyì wíkala mwab'ewu to; kàdi nebikèngele cishimà cyà Nzambi bwà kwaluja Mwanèètù wa bakàjì Burns cyàkàbìdì mu èkèleeziyà. Ncyà bushùwà.

<sup>36</sup> Piine apu, bayendè munanga awu mmufùme ku dyumuka mu lùpitaadi kuntu kwàka, ku Lùpitaadi lwà Baankolomù, mwikàle ne kànsèrè, mumana kukòsela lufù, ki Nzambi kumwondopa. Kàdi's ki yèyè ewu, mwalùkile mu èkèleeziyà, ne mubidi tumatuma mwímpè cyàkàbìdì bu mùvwàbì ne cyà kwikala bitèkemenà mu cikondo bu nùku. Nènku pàakamwondapa Mukalenge ku kabèlèngè kùle kapite bunène, kiine aku ne kànsèrè munda mwàkù, cintu cimwècimwè, kukaadi bidimu ne bidimu.

<sup>37</sup> Ne ndi mvùluka cikondo mene aci, pàvwà Mwanèètù Wood musòmbe mwaba awu apu. Mvwa mu kaadiikisha kakesè. Tuvwa bayè mu diitu mwàmwa, dilemba dyà nshindi, ki Cintu kampànda kungambila ne: "Alùkila kwèbè kumbèlu." Mémè kwalukila kumbèlu. Ne mòna's bìvwa bikèngela bwà nye ku Louisville, ncyàdyàkumanyakù to. Kàdi Mwanèètù Wood, mmukolèle pabwìpì ne Louisville apa, kwendeshaye màshinyì mu ntàntà mukwàbò wa nzùbu, kunyùnguluka, kunyùnguluka, kuyùnguluka, uteeta bwà kumpeta. Kàdi Nzambi ùvwa mundame mu ditumba kampànda, mwindile bwà Mwanèètù wa bakàjì Burns kulwa kungambila. Nènku ùvwa nyèyè, mukàjì wa bukitù awu, wàkalwa kungambila ne bàyendè ùvwa munkaci mwà kupùnga ne lufù mu lùpitaadi amu, ki twètù kuyaku bwà kusambidila.

<sup>38</sup> Ki kupwekayè, ne kwangatayè fòtò awu, uvwa Mukalenge mukwàte fòtò Wèndè awu, Dikunji dyà Kapyà. . . Nwènu bwònsò nukàadi bacimònemòne, ngèela meeji. Kucitèeka paanshi. Ki yèyè ne: "Nzambi munanga wa mu Dyulu," yèyè ne, "nkwàcìshèku bwà mpetèku Mwanèètù Branham dyàkàmwè. Ndi ne cyà kumupeta." Ki yèyè ne: "Mwanjèlò wa Nzambi, ndombòlèku kùdiye." Ki cidi cikèngelà aci's. Ke kujuukayè, ne kuyayè mu cimenga, bwà kufutayè musinga wà bintu, ùvwa mulombòdìibwe mùshindù wà pabwàwù mu disangu dikwàbò. Ke Nzambi kuntuma mfùmina mu diitu amu, too ne ku Louisville, ne kushààla mundame mu disangu adi bwà citùpà cyà díbà, ntàngila Mwanèètù Wood ùbwela mu disangu dyà cyanàànà díbà dyònsò kuulu aku, ùteeta bwà kumpeta, ke cìvwàye wenza. Nwamònu anyì?

<sup>39</sup> Mpindyewu, tudi bamanyè ne Nzambi mmumanyè mwaba

ùdi mwan'Èndè wa bakàjì mutekète awu mulàadika mwaba awu, ne Yéyè mmufwányine kwikala ùtèkemena bwà wèwè kusambila disambila dyà diitabuuja. Netwénzè cyònsò citùdiku pèètù mwà kwenza aci.

<sup>40</sup> Cikwàbò cintu citùdi baswè kwamba mu dindà emu, katùyì ànu ne mitù miinyika to, kàdi myoyi's, kùdi umwe wa ku bantu bàdi batámbe kwikala bàà lulamatu bândi...umwe wabò, ùndiku mutwilàngàne nendè kacya bándela, m'Mwanèètù Higginbotham. Wèndè...Mwanèètù wa bakàjì munanga mmuyè bwà kwikala ne Mukalenge Yesù. Mùsàlaayi wa bukitù wa Nzambi; misangu bùngì kaayi yínkaadiku mumumòne ùlwa ku cyoshelu's! Dijinga dyèndè divwa, misangu yònsò, bwà kufika ku mulongo wà babèèdi ewu, kùvwà Nyumà Mwîmpè mwà kumwambila cìvwà lutàtù lwèndè. Ùvwà mujingèjinge bwà kucyènza. Ne mmisangu bùngì kaayi yìkaadiye mwendèle pa cibumbà cyà ku cyambilu apa, kuteeta bwà kujandula dijingulula ní divwa—ní divwa mwà kulwa. Ne mu masangisha makwàbò ne mu myaba mishìlèshìlàngàne yìkaadiye muteetè, kàdi kaciyi ànu mwà kulwa to, nànsha nàнку.

<sup>41</sup> Ne pashìshe, kùkaadi ndambù wa mbingu, mbwela mu lùpitàadi mwàmwa, pàngàakuumvwà ne ùvwa ùsaama, ne dìbà dikaavwa diyè bikolè mu dilòòlò. Nènku pàngàakabwela mu lùpitàadi ne kusòmba ku luseke lwèndè aku, ki Nyumà Mwîmpè kupweka; ne kubwela buludi ne mu nsòmbelu ne kutandula kantu ne kantu, ne kukàtèeka ànu menemene mwaba ùvwa lutàtù lùsanganyibwa. Kàdi, cintu cyà pabwàci cìvwà ne, Mwanèètù wa bakàjì Higginbotham kàcìvwà nànsha muswè kushààla kàbidi apa ntàntà mule to. Ùvwà muswè kutúngunuka. Kùvwà Cintu kampànda cimubiikila. Wàkandamuna dibìikila adi ditùkù adi bwà kuyayè ne Nzambi. Ne nèngìikalè misangu yònsò ànu mvùluka cyòci aci. Èyowà. [Katupà kàà mukàbà wa mèyi munda mutupù—Muf.]

<sup>42</sup> Kabyèna bikèmesha to mùdi umvwa bibi paùdi ubwela mu cimenga; ncibènge Èvànjeeliyò. Ki lutàtù lùdiku ndwòlò alu. Ne yéyè ukaadi wa kabùtù. Dipaasalala dyà màyi dyà mu cidimu cyà 1937 adi kadyàkwikala cintu nànsha cìmwè to, too ne piikalà bwalu ebu bujikè. Kàdi, èyowà's, s'ncipiishìibwe, kakùyì mpatà to. Nènku ki bwà cinyi mufundu ùdi ku cimanu.

<sup>43</sup> Nènku, mpindyewu, mbibi bikolè. Nènku twètù kupeta lupangu elu, bintu bidi kaaba aka ebi, kàdi mvwa muumvwè ditùkù adi ne bàmwè bàà ku bânà bèètù bàdi ne tikì bwà kwimanyika màshinyi nànsha mene ku mwelelu wà ciseke cyà èkèleeziyà kwàka. Bundù bwà dikèma's! Nèmfutè tikì awu bu wèwè ànu mwà kummanyisha cìvwàci. Abi's mbyà luse's. Èyowà's, mukalenge. Èè, twètù, cikampànda, ndi ngèèla meeji ne piikalà...Ndi ngèèla meeji ne tucicidi ànu beena lupangu. S'ki cidì mikanda yà lupangu yàmba's, nànsha bishi. Bwejà màshinyi lwà apa nùnkù, ne pàmwàpa kwàkupeta tikì aku to.



Kàdi ndi ne disànkà mutùdi tuya batàngile ku mwaba ùdibu kabàyi bàfucisha tiki nànsha. Kí mmwômò anyi? Ncyà bushùwà. Bilenga be. Èyowà's, mmwômò. Mpindyewu, ncyêna . . .

<sup>44</sup> Nènteetè ànu bwà kwakula katanci kakesè, mu dindà emu, bwalu ndi ne cimpumpu cyà cìnsaamisha mutù, ne dyùlu dimpàte. Nènku—nènku ndi muswè kwangata cyena-bwalu cyà mu Dipungila Dikùlukulu, ne kulongesha ànu katanci kakesè cyanààna, bu Mukalenge mwà kwanyisha. Ne pashìishe pàmwäpa, dilòòlò edi, mèmè mwalùkile, bu Mukalenge mwà kwanyisha, mwalùkile pa díbà, ne nciyi mutàmbe kuzengela to.

<sup>45</sup> Kaa, byènzeki ànu ne ngèla meeji, kàbidì. Mwanèètù Kelly udi musòmbe ewu, ne Mwanèètù wa bakàji Kelly, bàdi ne cyà kulwa, ànu ku . . . Nùlwa lùkàsà ne mwènù mwónsò, paanyimà pàà didyà dyà mundaamunya, bwalu ndi bulelèlè ànu ne cyà kutentemuka mu mapingaja emu, ne maalu búngiwù, Mwanèètù Kelly. Ndi mvùluka dilòòlò adi, kuntu kwàka, mvwa nguumuka nya ku dibìikila kampànda panwàkabwela nwènù bwónsò. Èyo. [Mwanèètù wa bakàji kampànda ùdi wàmba ne: “Udikù mwà kulwa anyi, Mwanèètù Branham?”—Muf.] Mpindyewu, aci's—aci's cìdi ànu cìmpè, yààyà.

<sup>46</sup> Mpindyewu, pashìishe, nwànsambidilaayikù, ne nwàsambidilaayikù bwà . . . mapangadika àànyì, à Mukalenge, ikalè—ikalè Bwèndè Yéyè, àà matàmbe bwìmpè andiku mwà kwangata.

<sup>47</sup> Mpindyewu, tudi baswè kubuulula mu Mukàndà wà kale, wà kale awu, wà ndekeelu . . . Mukàndà wà kumpàla, Genèsè 35, nènku tudi baswè kubala ànu katùpà kakesè cyanààna kàà Mifùndu kaaba aka mu Mukàndà wà Genèsè. Nènku tudi tulòmba bwà Nzambi àsakidilèku mabènesha Èndè mavulè bu cishimikidi cyà cintu kampànda citùdi tujinga kulongeshapù.

<sup>48</sup> Nènku mbanganyi bàtu baswè kàlaasà kàà Dyàlumingu? Kaa, aci's . . . Mbanganyi bàtù bamanyi kwàkabangilàku? Ncyêna mmòna cyanza to. Cìdi bu . . . Mbanganyi bàdiku bamanyè mwàkabiikidiibwàci dyàmbedi? Mukàjàànyì ùdi penyi? Ùdi ne cyà kumanya aci's. Èyo. Cìvwa . . .

<sup>49</sup> [Mwanèètù Neville ùdi wàmba ne: “Mwanèètù Branham?”—Muf.] Èyowà? [“Bumpàndànji . . . Kùdi mukwàbò mpàndànji là kaaba aka mu dindà emu.”] Mpàndànji là mukwàbò. Nzambi àkubènèshè. [“Mwanèètù Naber.”] Mwanèètù nganyi? [“Mwanèètù Naber.”] Mwanèètù Naber, ùdi penyi? Udikù mwà kwela cyanza muulu anyi, Mwanèètù Naber? Nzambi àkubènèshè, mwanèètù wa balùme. Awu mmukàjèèbè ku luseke lwèbè anyi? Abi's mbìmpè be. Tudi ne disànkà dyà kwikalakù neenù ne díkù dyènù pàmwè neetù mu dindà emu. S'udi mumanyè ne udi mu diswa dyà Nzambi. Nwamònu anyi? Bikèngela wìkale nànkù, paùdi mpàndànji là, udi umòna's. Bwalu, méyi matùmina bantu bwónsò àdi ne:

“Ndàayi mu buloba bujimà nùkayiishè cifùkìibwà cyònsò Èvànjeeliyò.”

<sup>50</sup> Muntu udi mpàndànjilà! Mpindyewu, ncyèna—ncyèna ntàmba kucyùka menemene. . . *Mpàndànjilà* mmwàkù mulenga be, kàdi ndi ne mwàkù mutàmbe bwìmpè bwàwù. Wèwè udi mùpostòlò. Nwamònu anyi? Ncyà bushùwà. Mpindyewu, mwàkù ewu *mùpostòlò* ùdi ùmvwija cinyi? “Ewu udi mutùmìibwe.” Mwàkù *mpàndànjilà* wùdi wùmvwija cinyi? “Ewu udi mutùmìibwe.” Ncintu cìmwècìmwè aci. Pa nàнку, ba-mpàndànjilà, bapròfetà, balongeshi, ne bampaasàtà, ke bàdi bènza Èkéleeziyà. Ncyà bushùwà anyi? Bàpostòlò, bapròfetà. . . mùdìbo bàbàbìkila. Pa nàнку, bu mùdìbi ànu ne wèwè udi mpàndànjilà, anyi mùpostòlò, udi mutùmìibwe kùdì Nzambi, ku mudimu kampànda, ne udi misangu yònsò ànu mubingè. Dyànyi—dyànyi disambila ndyà ne, Nzambi àkubènèshè.

<sup>51</sup> Mwanèètù wa balùme ne Mwanèètù wa bakàji Foss bàdi mu njila batàngile ku Cuba, ku madimi. Bùumukila ku bitùpà byà malaba byà mashìka byà ku nord, batàngile ku meetu à luuya à ku sud, bwalu Èvànjeeliyò ewu ùdi ne cyà kuyiishiibwa pa buloba bujimà. Amen. Dishintuluka kaayipu’s wè!

<sup>52</sup> Udi mufùmìne penyi, mwanèètù wa balùme? [Mwanèètù wa balùme awu ùdi wàmba ne: “Nyàaya ku Izàlèèlà mpindyewu, mwanèètù.”—Muf.] Uyàaya ku Izàlèèlà.

<sup>53</sup> Kaa, ndi muswè. . . Ndi mmòna Mabel musòmbe lwà paanyimà pàapa, ndi mufwànyine kubiikila mukàjàanyi ne Mabel, bwà kunwimbilabo musambu:

Mbafùmìne ku Esètè ne ku Wesètè,  
 Mbafùmìne ku malaba à kule,  
 Bwà kwenza fètè ne Mfùmù, bwà kudyà bu  
 beenyi Bèndè;  
 Mùshindù mwinè ùdi beena lwendu aba  
 babènèshìibwe’s wè!  
 Bàbandila mpàla Wendè mujidila,  
 Bakenka ne bukènke bwà Nzambi;  
 Baabanyanganyi bàà ngàsà Wendè,  
 Bu mabwe à mushinga mukolè mu cifulu  
 Cyèndè cyà butùmbi bwà kukenkesha.

<sup>54</sup> Kabyàkwikalakù bilenga mu ditùkù adi anyi’s wè! Amen. Mukalenge àkubènèshè, ku Izàlèèlà aku; ne nwènù, ku mwaba wunùyaayà awu; awu’s mmabènèsha àanyi bwènù nwènù bàna bèètù mu dindà emu. Amen.

<sup>55</sup> Mpindyewu, kumpàlà kwà twètù kubuulula Bible. . . Tudi bamanyè ne eci ncyena-bwalu, kàdi Nzambi ùdi ne dyumvwija difùnda pankacì pàà milongo, nudi numòna’s. Pa nàнку, tudi ànu mwà kubala cyena-bwalu ne kulekela Nzambi ùtùpèèsha dyumvwija. Pa nàнку twìnyikàayi mitù yetù bwà katanci kakesè cyaanàna, bwà disambila.

56 Taatù wetù wa mu Dyulu, mu Dìná dyà Mukalenge Yesù, tudi tulomba bwà Wêwè kwangata Mèyi aa atwikalà mwà kubala mpindyewu, ne kuÀcibula buludi mu myoyi yètù. Nènku tülwe bitùùlùbitùùlù, mu cimùmà, ne didìpwekesha dyònsò, ne kaneemu kwònsò, mu Bwikadi Bwèbè. Nènku swàkù bwà Nyumà Mwimpè àngatè Dìyi dyà Nzambi ne àdiishè mwoyi wònsò. Ne wànyì mukumbajilakù, Udikù muswè anyì, Mukalenge? Bwalu ndi ndòmba nùnkù mu Dìná dyà Kilistò. Amen.

57 Èyo, netùbale ànu mvensa umwe anyì yìbìdì cyanààna, mwab'ewu, bwà twamónakù mwà kupeta ànu kaaba kakesè kàà kushindamijila bitùdì twamba. Genèsè nshapità wa dimiinu, tudi bamanyè. Èyo. Netùbangilè ku mvensà wa 15.

*Ki muntu kampànda kumusanganayè, . . . mònaayi, yéyè ùwva wènda ùlalakana mu budimi amu: ki muntu awu kumukonkayè, wàmba ne: Udi ukèbangana ne cinyi?*

*Ki yéyè kwamba ne: Ndi nkèba bânà bèètù bàà balùme: ngambilèku, ndi nkulòmba, . . . bàdi bàdìsha bisùmbù byàbò byà mikòòkò.*

*Ki muntu awu—ki muntu awu kwambayè ne: Bàkaadi bamanè kuya kwàka; bwalu mvwa mubuumvwe bamba ne: Tùyaayi ku Dotàna. Ki Yòzefù kulondayè bânà bààbò, ne kubàanganayè mu Dotàna.*

*Kàdi mbenze ànu bamumvena kule, kumpàla mene kwà kuseemenaye pabwìpì naabò, ku aci. . . yéyè bwà kumushipa.*

*Ki kwambilanganabo muntu ne mukwèndè ne: Mònaayi, ke mulòòci wa bilòòtà ùlwalwa ewu.*

58 Nènku Mukalenge àfilèku mabènesha Èndè ku Dìyi Dyèndè. Mpindyewu, Genèsè ùtu misangu yònsò, bwànyì mèmè. . .

59 Ngânwàmbìdì cìdì nshapità awu anyì? N'Genèsè. Ngèèla meeji ne, bu mèmè mwà kumòna, Genèsè 37, ne kubangila ku mvensà wa 15, nènku bwà nwènù bàdi bàcìfùnda. Mpindyewu tudi. . . Ngèèla meeji ne ngàmbi 35, kùkaadi katanci. Mvwa ne mabeji àbìdì malamàkana pàmwe. Ndi—ndi ndòmba luse. Bible mukesè wa kale wa Scofield ewu, ne bìdì ànu bu binkolèlekù bwà mèmè kubala, bwalu nkàadi mupìcishe bidimu makùmi ànaayi, nudi bamanyè's. Ne lwànyì. . .

60 Mbangambile ne bìvwa bikèngela bwà mèmè kwikala ne manetè à kubala naawù. Mèmè kuya kenzeja mateeta à mèsù àànyì, pàngàakafika mu mùshindù wà ne bìvwa bikèngela bwà mèmè kusàka ànu kusàka Bible wanyì awu kule bwà kubala. Ke ngàngàbukà kungambila ne dibòkò dyànyì kadyàkwikalakù bule bukùmbàne to, paanyimà pàà katanci, bwà kumwaluja kule. Nènku kukèngelabi bwà mèmè. . . Kwambayè ne bìvwa

binkèngela manetè à dibala naawù. Mémè kuteetesha mèsù àànyì, ne kumwenekawù mapwàngàne, dikumi pa dikumi. Kàdi mvwa mwà kumòna lusukì paanshì, mwaba awu, ànu bipeepèle pèèpèlèè. Kàdi kulùseemeja pabwìpì naanyì. . . Yèyè ne: “Paùdi ufika. . .” Yèyè ne: “Ncinyì cìdì citòlweshe nsuki yèbè mvya?”

Mémè ne: “Ncyèna mumanyè to.”

<sup>61</sup> Yèyè ne: “S’mbukùlumpe.” Ha-ha-ha! Yèyè ne: “Ki cìdì citàcishà mèsù à muntu paùdi upicisha bidimu makùmi ànaayi. Wèwè, mu bushùwà bwà bwalu, tumònyi twèbè twà mèsù tùdi tùbèetelela. Nènku bidi bikukèngela ànu bwà—bwà wèwè kucitwala, kwajikì’s.” Kàdi’s ndi ànu mutùngùnùke ne kucilàadikija. Nènku, èè, ncyèna ne dibà dyà kuya to, kàdi nènye—nènye dǐngà ditùkù, bwà kwangata ma—manetè à kubala naawù, pàngààbangà kutàmba kulongesha. Kàdi mpindyewu ndi ànu mbala cyena-bwalu ntùngunuka. Ne eci ke. . . Ndi ne Bible ewu kukaadi bidimu byàbùngì, mmufùnda ne maleeta makesè, makesè àà menemene.

<sup>62</sup> Mpindyewu, mu Genèsè, *Genèsè* ùdi ùmvwija ne “ntwàdijilu,” nshapìta wa dimiinu. Nènku vùlukàayi, ne, byònsò bidiku leelù ewu ebi, mbibangile bulelèlè mu Genèsè. Cìvwa mbangilu wa bintu byònsò. Cìvwa mbangilu wa—wa lupàndu. Cìvwa mbangilu wa mpèkaatù. Cìvwa mbangilu wa tusùmbu twònsò twà ntèndeleelu atu. Cìvwa mbangilu wa Èkèleeziyà mulelèlè. Cìvwa mbangilu wa èkèleeziyà wa mashimi. Cìvwa mbangilu wa bwakàne. Cìvwa mbangilu wa dishima. Cìvwa mbangilu wa bintu byònsò, mbitwàdijila mu Genèsè.

<sup>63</sup> Mvw’a kujinga bwà twàngatakù ngondo mitwè ku yisàtù pa bwalu ebu, bwà kushààla ànu pa cyena-bwalu cimwèpelè eci, ne kucyòndola ànu cyanàànà, kuciswikakaja ku Nyumà Mwímpè, ku myonjì yà Nzambì, kàdi kucijingila ànu pàmwè. Kàdi tàngilàayi mùdi Dìyì dyònsò diikàle ànu dìnwàngana ne Mèyi makwàbò awu. Cintu cilenga be!

<sup>64</sup> Dìyì dyà Nzambì dítu dìsonsola bikolè be! Cikondo nànsha ciikàle cyà bishi, dibà kaayi, muntu yònsò ukàadikù mubalè Cyena-bwalu eci, munda mwà. . . Ncifundibwe mpindyewu kùkaadi nkàmà yàbùngi, èyowà, pabwìpì ne binunu bisàtù, bipìte apu, yà bidimu’s. Ne muntu yònsò ukaadiku mubale Mufùndu ewu, mu cikondo ne cikondo cyònsò, mmusonsòdibwe kùdiWu, nwamònu’s, mvensa yònsò wa Mufùndu. Kakwèna cintu cikwàbò nànsha cimwè cìdì mwà kwangata kaaba kaaDi to.

<sup>65</sup> Mufùndu kampànda ùvwà mufùnda mu dikwàbò ditùkù, pàdiwu ùbadiibwa bwà cikondo aci ne bwà kiipàcìlè kààwù, bwalu bwàwù mbutùuka. Ndi mufwànyìne kukufùndila mukàndà, kwamba ne: “Mwanèètù munangiibwe munanga, leelù ewu ndi muyè ku mwaba kampànda ne mwenzè cikampànda, cikondo kampànda.” Aci’s ciyaaya buludi kùdi, ne

cibùkosa. Pàmwápa bwà cijaadiki cyà tubàdi anyi cikampànda, ncifwànyine kutwàdiibwa bu cijaadijki bwà kumpiisha anyi kutwà ku cyànyì, bwà kunjaadikila cintu kampànda, anyi kujaadika cintu kampànda cyà cimpiisha, kàdi kí ncifwànyine kwikala mukenji wà buludi bu mùdiwu mwà kwikala pàdiwu mufidiibwe kùdi.

66 Kàdi Bible kèna nàнку to. Mmufidiibwe kùdi bukwàbantu, ne bwà misangu yònsò ne bwà bikondo byònsò, bwalu Ùdi Díyi difùnda dyà Nzambi. Nwamònu anyi? Mèyi Èndè kaènakù mwà kupangila to. Kaàdyakufwàku to, ne pàdiku ànu Cyendèlèlè, bwà kashidi ne kashidi, wòwò neàtungunukè ànu ne kwikala ne dyumvwija dimwèdimwè adi, bwalu mMafumine ànu ku mishikù yà Nzambi. Nwamònu anyi? Kaèna mwà kupangilaku to! Anji elànganaayi ànu meeji pa bwalu abu, mùshindù ùdi Díyi dyà Nzambi dyà Cyendèlèlè. Wòwò àdi Mwoyi.

67 Mpindyewu, díyi ncinyi? Díyi kampànda mmeeji àdi meela patòòke. Ne pàdi ànu Nzambi wèla meeji cintu kampànda, cidi ànu mmeeji cyanààna. Kàdi pàdici ànu cileejibwe patòòke, kaciyèna mwà kushintuluka anyi kukùdimuka nànsha. Cidi ne cyà kushààla kashidi.

68 Bwalu, mèyi èbè àdi ne bwìmpè ànu mùdi bwèbè amu. Díyi dyà Nzambi didi ne bwìmpè ànu mùdi Bwèndè amu. Díyi dyèbè nciitupà cyèbè. Mulayi wèbè mmwìmpè ànu mùdi wèwè mwà kwikala mwìmpè amu. Nènku mulayi wà Nzambi mmwìmpè ànu mùdiYe mwà kwikala mwìmpè amu.

69 Mpindyewu, bu mùdi wa cifwàkà, udi mwà kwenza mulayi ne kwikala ne cyà kubenga kuwùlama, bwalu wèwè udi ànu wa cifwàkà wetù ewu. Mémè ndi ànu wa cifwàkà wetù ewu. Kàdi, Nzambi, mwikàle kàyì ùfwa to, ne kàyì mikàlù, ne wa ngulu yònsò, mwikàle myaba yònsò, Yèyè ùdi wamba díyi, ne Yèyè mmumanyè ndekeelu kacya ku cibangidilu, ne Yèyè ùdi mwà kudilama.

70 Abraham wàkabiikila bintu bìvwà kabiyikù abi, bu ne bìvwakù, bwalu ùvwa mutwìshiiibwe ànu menemene ne, cìvwà Nzambi mulayè aci, Nzambi ùvwa ne bukolè bwà kuciyèna, bwalu Yèyè kàvwakù mwà kwikala mwenze mulayi to ànu Yèyè mumanyè cìvwà ne cyà kwenzeka.

71 Nudi numòna mutùdi mwà kushààla biimànyine pa Díyi Dyèndè dìbà adi anyi? Cipeepèlè cìkolè nànsha cituuta bikolè byà bishi, cidi cìbèngangana naaDi aci, wèwè shààla mwikishile ne dísù dikolè ànu pa Díyi. Nzambi ngwàkaDyamba, Nganyì ukàadikù mumòne luseke lukwàbò lwà cipeepèlè cìkolè aci. Nwamònu anyi? Pa nàнку, wèwè usaama, elà ànu lwongò lwà musùkà wèbè mu Mwaba wà Diikisha awu. Wèwè mu dipampakana ne dikènga, wavùluka ne, Yèyè wàkamba ne: “Nèngiikalè neenù misangu yònsò, too ne kundekeelu kwà buloba.” Ne Yèyè ùdi. . . Yèyè wàkamba ne: “Maalu wònsò àdi

àkwàcishangana bwà dyàkalenga dyà bàdi banangè Mukalenge,” pa nàнку shààlaayi ànu mwaba awu.

<sup>72</sup> Muntu kampànda kufundayè, mwedi wa kasàlà kampànda kufundayè ne: “Lwongò lwànyì ndukwàte munda mwà cilàmbà cikùdika.” Cilàmbà cikùdika ncinyi’s? Ncintu kampànda cìdì cikànga apa bwà kubènga kumòna Kwàka. Ne lwongò lùdi lùsanganyiibwa munda mwà cilàmbà aci. Kwèna umòna mwikalàbi to, kàdi udi mumanyè ne kùdi cintu kampànda cìdì cikukwàte, cìdì cikwàte muulu Mwàmwa.

<sup>73</sup> Kàdi pàdi mbù ùkungula ne mu cipeepà cicolè, nukààdiku. . Ngèèla meeji ne pàmwàpa bàmwè bàà kunùdi kacya kabàtukù banji kupeta dyèsè dyà kumòna màzuwà mèlè lwongò to. Kaa, ekèlekèlè! Nkaatukù mwendèlemù dìbà dìdìbo bèèla lwongò mu mbù mùshindù *àwu’s*, mu mùshindù wà ne kaamazuwà kakesè aku kakàyìku mwà kubànda pamutù pàà—pàà mavwala to. Kàvwa mwà kupicila mu mavwala amu. Kàdi pàdi ànu lwongò alu lukwàte, aci’s ke cyònsò cìdì cyèenza dishùllangana kanà dyònsò.

<sup>74</sup> Anyì tudì tupicila pamutù pàadi, mwinshi mwàdi, tudìnyungulukila, anyì tupicilamù, kabyèna ne bwalu to; lwongò ndukwàte’s. Ke mùshindù awu ùdìbi pàdi bipeepèlè bikolè byà mu nsòmbelu bitwàdija kutùnyùkusha. Tudì pàmwàpa ne cyà kupicilamù, tudì pàmwàpa ne cyà kwendelapù, anyì mwinshi mwàbì, kubìnyungulukila, kàdi kulekela ànu lwongò lukwàcile mu cilàmbà cikùdika aci, batàngile ku cìdì kaciyì cimwèka aci. Katwèna ànu bamanyè menemene kùdìci to, kàdi’s cintu ncikwàte.

<sup>75</sup> Ànu mùdi mwànà mukèsè wa balùme ewu, nudi bamanyè’s, uvwa ne kandèkè kàà cibèjibeji awu. Nukàadi buumvwe lusùmwinu lwà kale alu, bwalu-bulonda abu. Yèyè ne: “Mmunyi mùdi umanya ne udi ne kandèkè kàà cibèjibeji ku lusongo kwàka’s?”

Yèyè ne: “Ncìdì ànu mutùngùnùke ne kukùumvwa kaja kavuma.”

<sup>76</sup> Pa nàнку, ki cyòci aci. Bu twètù mwà kukùumvwa mùcidìku ànu kaja kavuma, Nzambì ùkwàta mudimu ne myoyi yètù, dìbà adi tudì tumanya ne lwongò lwètù lùcìdì ànu lukwàte.

<sup>77</sup> Ngèèla meeji ne ùvwa m’Benjamin Franklin wàkakwàta bukènkè mu mùlàngì, wàkabàtamija bukènkè, nzemu ayi’s. Cintu kampànda munda mwèndè kubùkilaci, cyàmba ne: “Kùdi bukolè mu cyòci aci. Bukolè abu mbufwànyine kubàtamijiibwa.” Nènku pùikalàbi ne bukolè nàнку, bwà kubwayisha misèsù ne kutaayisha meetu, kukàngula buloba, ncinyi cìdìbu bufwànyine kwenza bwòbò bubàtamijìbwe musangu ànu ùmwèpelè? S’nebùkenkeshè, ne kupenya, ne kulenga buloba bujimà. Nènku Benjamin Franklin, ngèèla meeji, mwikàle mukwàte pa kandèkè kèndè kà cibèjibeji aku, kiikàle ne lusapi luswikila ku ndekeelu

kwà mukilà wàkù awu, ne mùlàngì lwà kwìnshi aku. Kàdi mmwënze ànu ùbùpeta, pëndè kàyì mumanyè civwàye naaci aci to, kàdi kubangaye kwela mbila mikolè ne: “Ngábùpecì! Ngábùpecì!” Kàvwa mumanyè ne civwa ncinyì to; kàvwa mumanyè civwàye mwà kwenza naaci to; kàdi ùvwa mumanyè ne ùvwa ne cintu kampànda.

Nènku ke mùdibi ne muntu yònsò udi ne dyèndè:

Ditèkemena kî ndiibakila pa cîngà cintu nànsha

Ànu pa Mashi à Yesù ne bwakànè;

Ne byònsò bìdi binyùngùlùkile musùùkà wànyì pàdìbi byùmuka,

Dìbà adi Yèyè ke ditèkemena dyànyì dyònsò ne cisombelu.

Pa Kilistò, Lubwebwe lushindàme, mpàndì mwimàne;

Myaba mikwàbò yònsò nduntekà.

<sup>78</sup> Mulediibe cyàkàbìdì musangu wùmwe, Nyumà Mwímpè ùdi wàngata kaaba Kèndè mu mwoyi. Bàmwè bansongààlùme kî mbafwànyine, anyi bansongà, anyi bàdi mwà kwikala kabàyi balonge mukànda, nànsha byòbì mùshindù kaayi; kakwèna muntu nànsha umwe udi mwà kucyumvwija to, pa nànkù kanudyùmù bibì to ne bwalu kanwèna balonge mukànda. Kanwèna bafwànyine kucyumvwija to. Kakwèna ànu kwànji kwikala muntu udi mwà kucyumvwija to, nànsha yèyè wa meeji matwè anyi wa lungenyi lutwè lwà bishi. Aci’s mmusokòntù wà Nzambi Nkàayèndè. Kàdi pàdi Dìyi adi dyàngata Mwoyi munda mwà mwoyi wèbè, ne wèwè uDimòna, wela lubila lukolè ne: “Mèmè ndi naaDì!” Kwèna mumanyè ciwikalà mwà kwenza naaCì to; kwèna mumanyè cyàkwenzelàCì to; kàdi udi mumanyè ne cintu kampànda ncikwenzèkèle, ne udi naaCì.

<sup>79</sup> Mpindyewu, ki bwà cinyì, pa Dìyi’s! Mbilenga be. Mpindyewu tudì tukùngamangana mu dindà emu, tudì tukenketa, kumpàla kwètù, ku dyànyì dimòna, cimwè cyà ku byena-bwalu byà mushinga mukolè byà mu Dipungila Dikùlukulu. *Yözefù* (netwàkulè pa) *Ûtwilangana Ne Bânà Bààbò*. Nkufwànyine kwikala mishindù lukàma mishiilàngàne yidi Nyumà Mwímpè mwà kuditwa mu cyòci eci ne kucikùtulwila myoyi yètù ne meeji ètù. Pa nànkù, mvwa ngèèla meeji ne, bu mmùncidi ndambù wa matùkù kaaba aka, tudì bafwànyine kwakula katanci kakesè mu dindà emu, bwà dimpàtà dyà muminu, nènku pàmwàpa kucyàngatulula kàbìdì dilòlò edi mpaasàtà yèyè kàyì ne cintu nànsha cimwè pa mwoyi wèndè to, nènku pàmwàpa kutùngunuka naaci ne kucijikija mu dimwè dilòlò, pùikalàbi ne Nzambi mmucìlongolòle mùshindù awu.

<sup>80</sup> Mpindyewu, tudì bamanyè bìmpè ngiikàdìlù yà Dipungila Dikùlukulu, mùvwàbi ne: “Bintu byònsò byà kale abi bivwa

mundidimbi,” Ebèlù 11, “mundidimbi wà bintu bicilwalwà.” Mùshindù mwinè ùdibi bilenga’s we, mùshindù mwinè ùdi Nzambi ùleeja mu mundidimbi’s wè!

<sup>81</sup> Nènku patùdi tumvwa mundidimbi awu, mutùdi mwà kwamba’s, tudi tumanya ne kùdi cintu kampànda kupita apa. Kùdi . . . Nzambi, mu ngulu Yèndè yònsò, mu meeji Èndè manène àdi kaàyì mikàlù awu, mumòne cintu kampànda pabwìpì ne kwenzeka, Yèyè ùdi mwà kudyànjila kucidimwija. Yèyè udi mwà kwenza bwà bintu byònsò bìkwacishanganè, nànsha cijji cikolè cyà muntu, bwà kuMutùmbisha, nànsha muntu udi ukwenzela bibi awu. Mutwàfika, paanyimà pàà katanci kakesè, bu Mukalenge mwà kwanyisha, ku mùshindù ùvwa bàna bààbù ne Yòzefù awu bamwenzèle bibi, ne Yèyè kukùdimuka buludì, e kwangata cyòci aci ne kucifikisha ku diMutùmbisha. Pa nàнку, katwèna ne cyà kutàcishila meeji to, cintu nànsha cimwè.

<sup>82</sup> Mùshindù mwinè wùvwà Nzambi, ku mwànà wa balùme awu, mudyànjile kuleeja patòoke dilwa dyà Mukalenge Yesù bwà musangu wà kumpàla, ne dilwa dyà Mukalenge Yesù bwà musangu mwibìdi, ne kucyenzela cyònsò mu nsòmbelu uvwa kàyì mumanyè cintu nànsha cimwè pa cìvwà munkaci mwà kwenzeka aci. Amen. Aci kaciyèna ànu cikwenzela cintu kampànda, bwà kumònakù Yòzefù mwànà mukwàte ne byà luse awu anyi? Mòna’s, kàvwa mumanyè cìvwà munkaci mwà kwenzeka to, bwà cinyi bìvwa bikèngela bwà bintu byònsò ebi kwenzekabi. Kàdi cyònsò aci’s cìvwa Nzambi, ùkwata mudimu, ùdyànjila kuleeja, ùleejila mu mundidimbi bintu bìvwà ne cyà kwikalakù.

<sup>83</sup> Dìbà adi nudi mwà kumòna Dìyì, munùdi nuDyàngata kaaba aka ne nuDìbala mu Genèsè, nuDìbala munkacìnkaci mwà Mukàndà, nuDìbala ku ndekeelu kwà Mukàndà, nènku Dìyì dyònsò dìnwàngana ànu edi ne dikwàbò mùshindù awu’s. Kàdi’s Dyàkafùndiibwa binunu byà bidimu kale, kùdi nkàmà yà bantu bashiilèshiiàngane. Nwamònu anyi? Nàнку awu, ki bwà cinyi, nudi numòna ne cyònsò cìdi ànu Nzambi. Ewu kàyì mumanyè mukwàbò, anyi mumanyè ne mMukàndà kaayì wàkafùndiibwa to, kantu nànsha kàmwè bwàWù; musangu mukwàbò, cikondo cikwàbò.

<sup>84</sup> Nènku tudi mwà kumòna, leelù ewu ne, Nzambi ùdi ùkwàta mudimu ànu menemene mwàkenzàYe kale wàwa amu. Tudi mpindyewu ànu twenda tuya, tukoobeka mu cidimu cipyacipyà, kuumukila ku mundidimbi wà cyà Kale aci. Ne mùvwàbi ne ku cibangidilu, mùvwà Nzambi, pààkamònàYe ne mpèkaatù neàkòokeshe buloba bujimà ne bantu bònsò, mùvwa ndongamu munène awu munyangàkàjìbwe; kàyì munyangakaja bwà kashidi to, kàyì mwenzulula to, kàdi munyangàkàjìbwe.

<sup>85</sup> Nwamònu’s, Sàtaanà kèna mwà kufùka to. Bwèndè bùdi ànu bwà kutwisha katungu. Byònsò binùdi numòna ne, mbibi abi,



cìdi ànu bwakànè butwisha katungu. Nwamònu anyi? Panùdi numòna mwena lubùkù wa kale mu mùsèèsù mwàmwa, aci's ng'ànu bapròfetà batwisha katungu. Nwamònu anyi? Panùdi numòna cintu kanà cyònsò cyà cibì eci, numòna mulùme wènda kàyì ne lulamatu ku micipù yèndè kùdi mukàjèndè to, aci's mbwakànè butwisha katungu bulwè bubì. Emu ne emu, numòna bakàji mu mùsèèsù, bènza maalu mwènzènzàbo emu ne bàshààla mùshindù ùdìbo ewu, abu's mbainàbànzà batwisha katungu.

<sup>86</sup> Mwva mupìcìla ku Louisville, dǐngà ditùkù, mèmè ne mukàjàànyì, kì mèmè kumòna cimanyinu pa didìdiishì, kutùvwà tufùmina ku didyà aku, lwà mu Mùsèèsù Mwitànù amu. Nènku cyàmba ne: “Mèèsà bwà bainàbànzà.”

<sup>87</sup> Mèmè ne: “Kacya kabàtukù banji kupeta kiliyà to.” To, inàbànzà kǐ mmufwànyìne kubwelamù to. Dǐbà didiye ùbwelamù, kǐ nyinàbànzà kàbidì to. Nwamònu anyi? Pa nànkù, kabàvwakù ne kiliyà nànsha, mwinshì mwà ciinè cimanyinu aci. Bainàbànzà kabàtu bàya mu myaba ayi to. Kàdi, nudi numòna's, cìdi cibwelàmù aci, mbainàbànzà batwisha katungu. Nwamònu anyi? Èyo.

Mpindyewu's, Nzambì, bwà kwenza ne bintu byònsò bìMutùmbìshè!

<sup>88</sup> Tudi tutwà cyanga bwà Noël, dilediibwa dyà Mukalenge Yesù. Byòbì mene, kacitu ànu menemene mufikilu wà dilediibwa Dyèndè nànsha. Mufikilu wà dilediibwa Dyèndè ùvwa mu ngondo wa cisanga-nkàsù. Bwalu, kùdi mashika èbè à kacya mu Yùdaayà, anyì mashika matàmbidìle mu ngondo wa ciswà munène, kutàmba mùdìwu mùneemu emu. Nànkù, tudi bamanyè nànkù. Nuvwa bamòne fòtò dǐngà ditùkù, ntanki kuntwaku mu nējè amu, ne bintu byà mùshindù awu, mu Yùdaayà. Nudikù mwà kudifwànyikijila balami bàà mìkòòkò basanganyibwa pambèlù pa kakùnà apu ne kuulu kwà mùshindù awu anyi? Kàdi, kǐ ngadi ditùkù to. Kàdi cìdi ne, ditùkù mene, kadyèna nangànangà ne bwalu to, bwalu mbwà—mbwà lwidì lutùdi naalu kumpàla kwà ditùkù dǐdì ditèeka ku luseke adi.

<sup>89</sup> Mpindyewu mònaayi. Nzambì mmwenzè ànu ùmòna dimiinu dyà mukàji adi, ne mùshindù ùvwadi dikònyangaja kuntwaku ne bwakànè butwisha katungu, Nzambì kufila mulayì ne ku mukàji awu nkùvwà mwà kulwila Dimiinu dibènèshìibwe. Nwacyùmvù anyi? Kùvwa mwà kwikala Dimiinu.

<sup>90</sup> Nènku Sàtaanà mmwenzè ànu ùmvwa aci anyi, mùvwàye mwimàne kaaba aku, mmwenzè ànu ùcyùmvwa anyi, kudibwinkamù bwà kubùtula Dimiinu adi. Kì kuteetayè bwà kucyènza mu Yòzefù. Wàkateeta mu bikondo byònsò. Kàdi ùcìdi ànu ùlwishangana ne Dimiinu dibènèshìibwe adi. Amen.

<sup>91</sup> Ndi muswè bwà nwènù kulwata kafulu kèènù kàà ngeelèlù wa meeji mwondòke awu, ànu bwà katancì kakesè mpindyewu. Bu mùdì, nùvwalè cifulu cyà lupàndu, ne tèelejàayi ne ntèmà

mpindyewu. Cintu kampàndà cyà musinga mutàmbe bunène ncyôci eci. Nènku udi mwà kubèngangana naaci; bidi ànu bîmpè. Kàdi, uvwakù mumòne ne, pàdi ànu . . .

<sup>92</sup> Kùkaavwa di—diimiciibwa, bwalu Evà ùkaavwa mumanè kwenda lwendu lubi ne mumanè kwwenza mpèkaatù. Aci nci fùmìne penyi? Aci's mmu Genèsè. Bantu leelù ewu bàdi bàteeta bwà kupeta dinungu didi dipangike pankaci pàa nyama ne muntu. Eci ndibuulula. Bible mmwambe, ne: “Nyòka ngwakambisha mukàji.”

<sup>93</sup> Leelù ewu, muntu ùdi mwà kumuna mwoyi wà nyama, ne nyama mutàmbe kuseemena pabwipi ne muntu ùdi nsòkòmuntù. Bàdi mwà kumufikisha ku dipwita cishibà cyà mfwanka, kwendesha dikalù, kulwàta cifulu, kumufikisha kudicisendamija ku mutù. Aci's cidi ànu bu mùdi “tùye” ne “shikwàte” bwà kabalù. S' bidi byumvwika's. Yèyè kèna ne musùukà to. Kèna mwà kwela meeji to. Ùdi ànu mwà kwendela ku cyonà. Kèna ne musùukà nànsha. Dìbà adi bàdi ne dinungu dipangike, ànu munkaci emu mene, didibu kacya kabàyikù bakùmbane kupeta to. Nènku munda mwà bidimu binunu bisambòmbò mbateetètètèe bwà kwakwishakù nsòkòmuntù dìyi kampànda, kabàyi mwà kucyènzakù to. Kabàadyàkucyènzakù to. Kàdi, tudi bamanye ne twètù tudi mwoyi wà nyama. Tudi mwoyi wà micì, wa ku buloba.

<sup>94</sup> Mùmvwà ngàmba ditùkù adi, ku citàlù cyà mwanèètù wa bakàji munanga. Twètù tudi musumbà wa bintu dikumi ne bisambòmbò byà ku buloba, byà bukènkè bwà mu cibwàshibwàshì, ne mpiitùloolù, ne bikwàbò bitèeka pàmwè. Tuvwa kaaba aka pààkaakulà Nzambi ne kwamba ne: “Kwikalè,” mibidi yètù yivwa kaaba aka. Kàdi, Cintu kampànda, Meeji à mfùmù kutùdyundisha mu citùdi mpindyewu eci. Mutwènze ne byanza ne mabòkò, ne bikwàbò, kì mbwà kutùbùtula to, kàdi bwà twamòna mwà kwikala ne mwoyi kashidi. Mpèkaatù ngudi mwenzè dibùtula adi. Nènku Yèyè Udi mutwènze, katùyi ne cingènyingenyi nànsha—nànsha cimwè cyà kwikala kaaba aka, Ewu wàkatwènza ne kutwàngaja bintu ebi ne kutùvwija citùdi mpindyewu eci awu; Kènakù mwà kutàmbe, ku ditùpèesha budiikadidi bwà disungula bwà kuciitaba, ne ku Dìyi dimwèdimwè dyàkatùfùkàye adi, mmutùlayè ne Yèyè neatùbiishè cyàkàbidi. Mmuni mwàbèngà mpiitùloolù yònsò ewu kutamba kusambakana, ne tupwishipwishi, ne bikwàbò, mu . . . ku Dìyi dyà Nzambi!

<sup>95</sup> Mpindyewu, ku cibangidilu, pààkaakulà Nzambi, ne Sàtaanà ùvwa mwimàne mwaba awu ne kucyùmvwayè.

<sup>96</sup> Nènku bantu bàdi bàteeta bwà kupeta dinungu didi dipangike edi. Nènkwbabilè, ku dibuulula, pawikalà muswè kudyàkidila. Muntu udi mupangike awu, pankaci pàa nyama ne muntu, n'nyòkà, kumpalà kwà kumuumushabo mikòlò. Bible

mmwambè ne: “Yèyè nguvwa ne budimù kutàmba nyama yònsò,” kàyi mulambi wa panshi to, “wa mu budimi bwònsò.” Yèyè ùvwa ewu wàkambisha mukàji, mu bulenga bwèndè bwà kwísù, ke yèyè kwimita. Nènku mpindyewu, mu kwenza nàнку, ne kumòna ne mpèkaatù ùvwa ùlwa, Nzambì wàkamwela mulawu wà dikèma mu mùshindù wà ne maalu à mamanya kaàyiku mwà kupeta malanda pankaci pàà nyòkà ewu, mùdiye mumanyìibwe leelù emu, ne bukwàbantù to. Kàdi’s ke mwaba ùdi muntu webè mudishinde, ne mupwekèshìibwe milongo awu, pankaci apu, uvwa mubàswikile ku mwoyi wà nyama. Ki bwalu abu’s.

<sup>97</sup> “Nzambì mmucisokòke beena lungènyi ne batàlame, kàdi neàcisokòlwèlè bânà bakesè bu bàdi baswè kuyiila.” Nwamònu anyi?

<sup>98</sup> Ki muntu wenù mudishinde awu’s, nyòka awu. Wàkumushiiibwa kuumukila ku . . . nutàmbe budimù, mutàmbe bunè, mutàmbe bulengèle, mutàmbe kufwànangana ne muntu. Nènku pasiishe bwà bwalu bwà bubì bwàkènzàye ne Evà ebu, Wàkamwaluuja ku mulambi wa paanshi ne: “Kwendela mu difù dyèndè, matùkù èndè wònsò à mwoyi, ne bivwa bikèngela bwà lupwishi kwikalalù cyàkudyà cyèndè.” S’ki mwaba ùdi maalu à mamanya mwà kufika kuntwaku, ne mucì wàbù ùdi ùshiimbudiibwa.

<sup>99</sup> Mònaayi ne, mpindyewu, mukàji awu mmwènze ànu ùmòna ne yèyè . . . kùdi . . . Mpindyewu, yèyè ùvwa museeswishiiibwè. Kàakatwàla mpèkaatù to. Yèyè wàkaseeswishiiibwa. Wàkadyelela meeji ne cìvwa cyà bushùwà. Kàdi ne: “Adàmà kí ngwàkaseeswishiiibwa to,” mùdi Bible mwàmbe. Ùvwa mumanyè ne bivwa bibì, ne bivwa bikèngela bwà yèyè kwenza cintu cìmwècìmwè cìvwà nyama awu mwenzè aci.

<sup>100</sup> Ke kulelayè mwanèndè wa balùme wa kumpàla, mwinè awu, bimanyinu byònsò byà dyabùlù bivwa mu mwànà wa balùme awu. Yèyè ùvwa mushebeyanganyi. Ùvwa ne mukàwu. Mmunyi mùdiye mufwànyìne kufùmina ku musùlù mukezùke wà Nzambì awu? Bivwa bikèngela bwà cìfuminè kùdi mubì. Nènku mmwenze ànu wènza cyòci eci, pashiishe yèyè, dyabùlù, kukwàta mudimu ne cyamu cyèndè cyà mudimu.

<sup>101</sup> Kulelayè mwanèndè wa balùme mwibìdì, uvwa mufwànàngàne ne Adàmà awu, kàdi’s ke Abèlè awu. Nènku, lukàsàlukàsà, dyabùlù kuteeta bwà kubùtula dimiinu dyakànè adi. Ke kukùdimukayè ne kushebeya Abèlè, dyàmbedi; cìdi cìfwànyikijilu cyà Yudààsà ne Yesù. Kumushebeya ku cyoshelu; kùvwà, Yesù, Yudààsà mushebèele—mushebèele Yesù, kuMutungilayè bwà binjànjà byà mfranga makùmi àsàtù ne kuMusùmbishayè. Èyo.

<sup>102</sup> Kàdi, mònaayi. Pààkènzàye nàнку, dìbà adi Nzambì, cìfwànyikijilu cyà Kilistò, byònsò bibidì lufù ne dibìikà dyà ku

lufù, Wàkajuula Setè bwà kwangatayè kaaba kèndè. Nwamònu anyi? Ki dyabùlù kudimbatanganayè ne Setè.

<sup>103</sup> Mpindyewu tàngilàayi. Kubangila apu, kumpàla kwà kabùtù kàà mvùlà ya Noà, kùvwa ndelàngányi mulongolongo yà bantu bàakafùminà ku bânà bàà Kaayinà, bafùmìne ku buloba bwà Nòdà, ne bwòbò bàvwa beena maalu à mamanya, bàà meeji matwè, bàà lungènyi, bantu bàà dikèmà be. Bàvwa mene bèngulula byamu. Bàvwa biibaka nzùbu. Bàvwa ne dishidimuka dyà dikèmà. Bible ùyaaya kumpàla ne wàmba mwàkadìbo bàkwàta mudimu ne mikùba, mwàkadìbo bàkwàta mudimu ne byamu.

Kàdi, musùmbà mukwàbò ùvwa wà balalakanyi.

<sup>104</sup> Kàdi, bisùmbù byònsò bìbìdì abi bìvwa byà batèndeledi. Kaayinà ùvwa mutèndeledi. Abèlè ùvwa mutèndeledi. Ki Nzambì kwela mushonyi, cìvwa ciikàle cyakànè. Kaayinà ùvwa mutèndeledi ànu mùvwa Abèlè amu. Bwònsò bàbìdì bààkiibaka byoshelu. Bwònsò bàbìdì bàvwa biitabùùje Nzambì. Bwònsò bàbìdì bàvwa bakuukwila Nzambì. Bwònsò bàbìdì bààkatwàla mapà.

<sup>105</sup> Mpindyewu tàngilàayi mamiinu àbìdì awu. Dìmwè, dilwishangana; dibì dìteeta kubùtula Dimiinu dyakànè's. Ki kuteetayè bwà kubùtula Abèlè; ncyàkenzayè's, kàdi Nzambì wàkajuula Setè bwà kwangatayè kaaba kèndè. Wàkeela meeji ne ùvwa mupetèle Yesù mwaba awu mene. Tàngilàayi munda mwà cikondo, myaba yònsò. Yèyè, mwaba wònsò ùvwàye ùlwa, wàkafimpakaja Dimiinu adi's. Pàakashebeyàye umwe, anyi mukwàbò, kudyàmbidilayè ne ùvwa mupete Dyòdi adi. Nènku, ndekeelu wa byònsò, yèyè—yèyè kulumbatangana ne Yone Mubatiiji, ndekeelu wa byònsò kumukosa mutù. Kwelayè meeji ne ùvwa muMupetè dìbà adi, kàdi kusanganayè ne Yèyè ùvwa ùsanganyibwa mu Yesù emu. Wàkashebeya bânà bwònsò bàà mu mabòkò abu. Nènku, Mòsà; kuteetayè bwà kushebeya Mòsà. Wàkateeta mùshindù wònsò wùvwàye mwà kunyangakaja Dimiinu adi, ne pàakashipàye Kilstò ku Kàlvaryò; kàdi Nzambì wàkaMubiisha kàbìdì ku lufù, mu ditùkù diisàtù, ne pashiishe Yèyè kwaluja Nyumà Mwímpè bwà kubiikila bânà bàà balùme ne bàà bakàjì kùdì Nzambì. Nènku dimiinu dibì òmwèdimwè adi, dyà butèndeledi adi didi dikèngesha Dimiinu dyàkànè adi kàbìdì leelù ewu. Nudi nuci mòna anyi? Bàdi bàteeta kubùtula Ditàmbà dyakànè dyà Nzambì adi.

<sup>106</sup> Mpindyewu, nseke yònsò yìbìdì ayi, bu nwènù mwà kumòna, byàkabangila mu Genèsè, batèndeledi ku nseke yònsò yìbìdì. Umwe wabò, wa mu cyena-màngumba, badibàndishi. Ne mukwàbò, mudìpwekèshe, wènda wèndela mu Nyumà, ku dibuulula.

<sup>107</sup> Mmunyì mùvwàku Abèlè mwà kumanya ne cìvwa mmwànà wa mùkòòkò pamutù pàà mamuma à mu budimi? Bwalu

cyàkabuuludiibwa kùdiye, ku dibuulula dyà kùdi Nzambi.

<sup>108</sup> Yesù wàkamba cintu cìmwècìmwè aci, pààkajìkulà Peetèlò ne Yèye ùvwa Mwânà wa Nzambi. Yèye kwamba ne: “Kí mmusunya ne mashi bidì bikubuulwile eci to, kàdi Taatù Wanyì udi mu Dyulu ngudi mukubuulwileci. Pa lubwebwe elu. . .” Lubwebwe, kí m’Peetèlò to, kí n’Yesù to, kàdi pa dibuulula dyà kùdi Nzambi. “Nèngiìbakilèpu Èkèleeziyà Wanyì, ne biibi byà ifernò kabyèna mwà kuMutàmba bukolè to.” Nwacyùmvù anyi? Ndibuulula dyà kùdi Nzambi.

<sup>109</sup> Mpindyewu tàngilàayi. Diditàcisha dyònsò, dyà cikondo, kuntwaku, bààkatwílangana mpàla ne mpàla ne bààkalwangana bikole. Tàngilàayi pàvwà Moàbà ùsanganyiibwa pa kakùnà apu, ne Izàlèèlà ùvwa ùsanganyiibwa mu cibandabanda amu. Ne Izàlèèlà pèndè munkaci mwà kulòmba ànu bu mwanèètù wa balùme, muntu mukàlàngà, bwà kupìcilaye mu buloba bwàbò, batàngile ku buloba bulaya bùvwà Nzambi mubàlayè abu; balòmbè ànu kaaditàbuluja kakesè cyanàànà mu èkèleeziyà wabò’s, mu ngakwílù mukwàbò. Ànu bwà kupìcila mu buloba abu, ne kulayabo ne bàvwa mene mwà kufuta bwà mashìnda àvwà ngombe mwà kudyà. Ne bàvwa bàpìcila ku cibeeba cyà mfùmù, ne bintu bìvwàbo mwà kwenza pàvwàbo bàpìcila mu malaba awu apu, nènku bàvwa mwà kucivwiya cyakànè. Kàdi, mukàwu. . .

<sup>110</sup> Mpindyewu, Moàbà, buloba bwà Moàbà kabùvwa bwà mwena dyabùlù to. Bàvwa bìitabuuja Nzambi umweumwe uvwa Izàlèèlà mwitabùùje awu, bwalu bàvwa bânà bàà balùmè bàà mwânà wa bakàjì wa Lotà; Mwânà wa bakàjì wa Lotà wàkiimità pàvwà Lotà mukwàcike maalà, kùdi tatwèndè sungasunga. Ke kuyabo kuntwaku, ne bwòbò. . . S’ke kùdi beena Moàbà aba bafùmìne.

<sup>111</sup> Kàdi pààkapàtuka mupròfetà wabò, mulongeshi wabò, mwena lukùkà lwà byùmà, e kwasayè byoshelu, byoshelu mwandamutekète, ànu menemene bùngì bwà byoshelu bivwà bilòmbiibwe kaaba aka abi. Ke Moàbà ewu musòmbè’s, buloba bwìmpè bunène bwà cyena màngumba, bulongolola bwònsò ne bwakaja.

<sup>112</sup> Kàdi’s ke Izàlèèlà ewu, munsantu mukesè mubùnguluki wa mu malaba wa kale wènda ùlalakana mu ntentà, ùfùmìna ku mwaba ne ku mwaba. Wèwè udi wamba ne: “Munsantu mubùnguluki wa mu malaba”? S’ke cyàkadibo bushùwà, bu bwòbò—bwòbò bàdi cidìbo bàbùikila, leelù ewu ne, mmunsantu mubùnguluki wa mu malaba.

<sup>113</sup> Pààkasabukàbo Mbù Mukùnze awu, ke Nzambi kwenzayè cishimà kumpàlà kwàbò aku, Milyàmà kubàkulayè ngoma wa mutumbi ne kubanga kwimba ngoma, e kuvùkuta lùbilu ku mwelelu wà musùlù aku, wèla mbilà mikolè ne ùtùpika, ne ùja maja mu Nyumà. Ne bânà bàà bakàjì bàà Izàlèèlà

bàmutwe munyimà, bènda bàtùpika, bèèla mbilà mikolè, bàja maja mu Nyumà. Ke Mòsà eku mwimàne ne byanza byela muulu, pàmwápa wimba musambu mu mwakulu wùvwà muntu nànsha umwe kàyì mwanji kuumvwa kwònsò eku to, musambu wùvwà muntu nànsha umwe kàyì mwà kuumvwa to. Wàkimbila Mukalenge, mu Nyumà. Piikalà aci kaciyi bansantu babùnguluki bàà mu malaba bàà cyena-leelù to, mèmè ncyèna mumanyè kwà kubàkèbela to. Bàvwa ne bimanyinu ne maalu à kukèma.

114 Mpindyewu, piikalàbi ne Nzambi ùtu ànu ùneemeka biitabi bàà maalu mùdiwu amu, tàngilàayi kùnweku's, Moàbà, twétù bakùla bilondèshile Mifùndu, ùvwa mwitabi wa maalu mùdiwu ànu mùvwà Izàlèèlà amu. Ùvwa ne byònsò bìvwà naabi Izàlèèlà abi's. Ùvwa ne byoshelu mwandamutekète. Ke cìvwà Nzambi mulòmbè's; Izàlèèlà ùvwa ne byoshelu mwandamutekète. Ùvwa ne milàmbù mwandamutekète mikezùke. Izàlèèlà ùvwa ne milàmbù mwandamutekète mikezùke. Ke Kaayinà ne Abèlè abu, cyàkàbìdì. Nwamònu anyi? Èyo. Wàkalambula bimpàngà byà ngombe mwandamutekète. Wàkalambula bimpàngà byà ngombe mwandamutekète. Wàkalambula bimpàngà byà mìkòòkò mwandamutekète, wàmba ne...wìtabuuja ne Kilistò ùvwa mwà kulwa. Wàkalambula bimpàngà byà mìkòòkò mwandamutekète, cintu cimwècimwè aci. Ànu mwitabi wa maalu mùdiwu mùtù biitabi bàà maalu mùdiwu mwà kwikala amu's wè!

115 Kaayinà wàkiibaka cyoshelu; Abèlè wàkiibaka cyoshelu. Kaayinà wàkalàmbula mulàmbù; Abèlè wàkalàmbula mulàmbù. Abèlè wàkakuukwila; Kaayinà wàkakuukwila. Kàdi, Nzambi wàkashindika, wàkajaadika ne Abèlè nguvwa disungula Dyèndè.

116 Nzambi wàkajaadika kaaba aka ne Izàlèèlà nguvwa disungula Dyèndè, bwalu Izàlèèlà ùvwa ne citàmbe-mfùkilu mu citùùdilu cyàbò. Nànsha nànkù, ne bilèmà byàbò byònsò, bàvwa ne Dikunji dyà Kapyà dyènda dibàlonda. Bàvwa ne difuta dyà cibawu bwà dyondopa dyà kùdì Nzambi, ne bènza dyondopa dyà kùdì Nzambi; nyòka. Bàvwa ne lubwebwe lutuuta. Bàvwa ne bimanyinu ne maalu à kukèma mu citùùdilu amu.

117 Pààkalwà Yone, yèyè ùvwa mutàmbe-mfùkilu. Pààkalwà Yesù, cìvwà ncitàmbe-mfùkilu. Kàdi mwena lukuna, ku luseke lwà biitabi bàà maalu mùdiwu alu, ùvwa misangu yònsò ànu ùkèngesha citàmbe-mfùkilu.

118 Nudi numòna cìdiye ùteeta kwenza leelù ewu aci anyi? Cintu cimwècimwè aci ne: "Kàtushàayi dyondopa dyà kùdì Nzambi's! Kàtushàayi bantu abu's! Kabèèna ne bwà nsongo to!" Bantu bàà myànzù mitùmbùke, bantu banène! "Bàkàtùshaayi!" Mwanèètù, kí ncìngà cintu to ànu mwonji wà mvinyò awu, wènda ùdifinda kacya mu Genèsè, ùbwela mu Bwàkabuulwibwà.

119 Ndi ngàngata luseke lwànyì pàmwè ne bansantu babùnguluki bàà mu malaba!...?...Nànsha ciikàlè cinyì... Kacya ncìtukù mwanjì kumòna munsantu mubùnguluki wa mu malaba to. Aci's ndìnà didì dyabùlù mutwè Èkèleeziyà wa Nzambì, pàdidi kadiyì dyà mwòmù amu to. Kí mbansantu babùnguluki bàà mu malaba to. Mbànà bàà balùme ne bàà bakàji bàà Nzambì, mbabùmvwè bibi kùdi bàà pa buloba.

120 Mpindyewu, Yözefù wàkalediibwa kùdi tatwèndè, ne wàkanangiibwa kùdi tatwèndè, kàdi kukinyiibwa kùdi bânà bààbò. Mpindyewu mònaayi, cimfwànyì cipwàngàne cyà Mukalenge Yesù. Ndi muswè bwà nùmonè mùvwà mwoyi Wèndè mufwànyikijìibwe, mu Dipungila Dikùlukulu, byònsò bifwànyikija mpindyewu. Tàngilàayi paanyimà pàapa nùmonè fòtò awu; ke mundìdimbì awu's, ne nudi numòna cìdì cintu cilelèlè aci. Mpindyewu mònaayi's, Yözefù, ùdi cìfwànyikijilu cyà Kilistò, cìfwànyikijilu cyà Èkèleeziyà, cìfwànyikijilu cyà Nyumà Mwímpè. Cìfwànyikijilu...Yèyè ùvwa mfùmù wa ditanta, ànu mùdì Kilistò amu, ànu mùdì Èkèleeziyà leelù ewu emu.

121 Mònaayi, kàbìdì, ne, pàakalediibwàye, tatwèndè wàkamunanga ne wàkamwenzela cinkooci cyà meekala àbùngì. Mpindyewu, kùdi ànu meekala mapwàngàne mwandamutekète mu meekala wònsò. Makwàbò wònsò mmáfùmine ku meekala aa. Nènku cinkooci aci pàmwàpa cìvwa ne meekala munda mwàcì, cyà meekala mwandamutekète mashilèshilàngàne, mishoonyi yà meekala, mu cinkooci cìvwa taatù mwenzè aci. Bu nwènù mwà kumòna, pàmwàpa Yakòbò kààkuumvwa ne mu dìbà adi, kàdi aci cìvwa cyùmvwija ne “Mmulayiibwe Awu.” Pàakapèeshà Nzambì Noà cimanyinu cyà mwanzankòngòlò, meekala mwandamutekète awu, cìvwa mmulayi, anyi Ewu wa Cipungidi. Nzambì ùvwa mwenze cipungidi cyà ne Yèyè kàvwa kàbìdì mwà kubùtula buloba ku màyi to.

122 Nènku cipungidi cyà Nzambì cìvwa kàbìdì citùngùnùke mu Yakòbò, mu Yözefù. Abraham ùvwa disungula, ne Izàkà ùvwa dibingishiibwa, ne Izàlèlèlè ùvwa ngàsà, ne Yözefù ùvwa bupwàngàne. Ki umwèpelè ùvwa ànu ne meekala awu.

123 Tudi tumòna Yesù musòmbe pa Nkwasa wa butùmbi, ne meekala, mwanzankòngòlò muMunyùngùlùkile, mu Bwàkabuulwibwà 1. Cìvwa ncìpungidi cyà Nzambì ne bantu. Kilistò...S'ki cyòci eci. Kaa, mùshindù mwinè wùndì muswè bwà nwènù kucimòna's wè! Kilistò ncìpungidi cyà Nzambì ne bantu Bèndè. Kí mmàngumba to; kàdi Kilistò ncìpungidi cyà Nzambì.

124 Ànu mùvwà Yözefù mukìnyìibwe amu, ke mùdì kàbìdì Kilistò mukìnyìibwe leelù ewu. Kí mbaswè kwamba ne mbakìne Kilistò to, kàdi byenzi byàbò bidi bijaadika cidìbo bènza. Bàdi bàbèngàngana ne dinyungakana Dyèndè dyònsò; bàakula

bwà cyenzedi Cyèndè, midimu Yèndè, ngenzèlù Yèndè yà yikèmesha ayi. Èè, bushùwà's, tudi ne Sàtaanà mu cituùdilu amu, kàbidi, mvità kacya ànu yàmòngana. Cyà bushùwà's. Ne bwòbò nebàfunkunè mèyì à Sàtaanà. Kàdi, ncyèna ncyùka cidi Sàtaanà wènza bwà—bwà kuteeta kufila cibwejakaji nànsha. Diyì dyà Nzambì ditu diimana dipwàngàne, ne mulyì Wèndè mmupwàngàne. Ncyàdyàkuswaku kashidi bwà kuya ku luseke lwà musumbà awu to.

<sup>125</sup> Mònaayi ne, ki Yèyè awu mwaba awu, Cipungidi aci. “Bìvwa bikèngela bwà Kilistò kumweneka bu dibwe dyà yaspà ne dyà sàrdwanà,” mu Bwàkabuulwibwà. Aci's civwa dibwe dyà pa cyàdi. . .dibwe dyà ku dilediibwa, èyowà's wè, kwambwila ku Lubènà too ne ku Benyàminà. Aci civwa ndidileeja dyà sààdi ne yaspà, mùvwàbi bidileejiila pàmwè mu Bukènkè bwà Nzambì, mwenzè cipungidi aci mu nyùngulukilu wa Kilistò, mwanzankòngòlò awu. Nènku cidi cyàkula bwà cinyi? Lubènà, mukùlumpe ku bwònsò awu; Benyàminà, mwànà mutekète ku bwònsò! Kuumukila ku wakumpàla too ne ku wa ndekeelu: “Yèyè nguvwa ewu Wàkadiku, Udikù, ne Wàlwa Awu; Muji, Mùtòlokù wà Davidì. Yèyè ki Mùtootò wà mu Dìndà. Yèyè ngwa kuumukila ku A too ne ku Z; Alpha, Omega; Dileejiibwa dyà Nzambì kwambwila ànu ku ntwàdijilu wa cikondo too ne ku ndekeelu kwà cikondo. S'ki yèyè awu, cipungidi cyà Nzambì ne bantu Bèndè.

<sup>126</sup> Ne bintu bikwàbò byònsò ebi, Yòzefù, Davidì, bapròfeta bwònsò abu, bàvwa ànu dileeejiibwa. Amen. Mwikàle ùleeja, kuumukila ku Dimiinu dilelèlè dyà mu budimi bwà Edènà, too ne ku cikondo cyàlwàYe bwà musangu mwibìdi, mu Butùmbi, bwà kwakidila bantu Bèndè ne Èkèleeziyà Wèndè. Ki cyòci aci's, cilenga cyà kumòna.

<sup>127</sup> Yòzefù, bânà bààbò bàvwa ne dyambu kùdìye. “Bàvwa bamukìne, kakùyì bwalu to,” bwalu ùvwa musonsòdiibwe mu mùshindù mutàmbe mfùkilu. Nwacyùmvù anyi? Kaayinà wàkakina Abèlè, kakùyì bwalu to, ànu mbwlu ùvwa musonsòdiibwe ku citàmbe-mfùkilu. Moàbà ùvwa mukinè Izàlèlèlè, kakùyì bwalu to, bwalu bàvwa ne dyondopa dyà kùdi Nzambì, bimanyinu, maalu à kukèrà, ne bishimà. Kumukinà, kakùyì bwalu to, ne kàyì mufwànyine kumulekela ùpìcilamù. . .

<sup>128</sup> [Katùpà kàà mukàbà wà mèyì munda mutupù—Muf.]. . .bwà kwikala ne mukàji wa mwanèènu. Amen. [Katùpà kàà mukàbà wà mèyì munda mutupù.]

<sup>129</sup> Mpindyewu, nwènù balunda bàànyì bananga, ndi muswè kunùvùlwija cintu kampànda, ne ndi muswè bwà nwènù kucibweja mwinshì mwà lubadi lwitànù mu luseke lwà dyàbakàji, mu nntètà wa cibambalu cidìbo bàbiikila ne mwoyi aci.



130 Kacya, mu cikondo nànsha cimwè anyì pa díbà nànsha òmòwè, mùkàadìku Nzambi musonsòle muntu, kacya kàtukù mwanjì kuya ku luseke lwà butèndeleeedi, batèndeleeedi bàà ku dína bàà pa buloba. Kacya yéyè kàtukù mwanji kuswikakana ne màngumba to. Misangu yònsò, yéyè ùvwa ànu ùlwishangana naawù, ne ùlwisha màngumba à ditùkù adi, ne ùlwisha ndongolwelu wa ntèndeleeelu wa ditùkù adi. Ndeejààyikù mupròfetà umwèpelè, ndeejààyikù ùmwèpelè mu Bible, ùtùku muntu nànsha umwe wa Nzambi muumvwàngane mene ne nkwaka yà ku dína yà ntèndeleeelu yà ditùkù dyèndè. Amen.

131 Nànsha Eliyà mene, paanyimà pàà mumanè kwibaka cilongelu cyà bapròfetà, mòna's, pàakabàndàye kuntu kwaka, bàakaswa bwà yéyè kuumuka. Yéyè ne: "Mwab'ewu mmutàmbe kubùlakana." Nudi numòna anyì? Aakàbà ne balombodi bàà ntèndeleeelu bàà ditùkù dyèndè; Eliyà wàkaditàpulula naabò, ku Mukùnà wà Kaamèlè.

132 Tàngilàayi Yone Mubàtiji, wàkaditàpulula, kàyikù nànsha muyè mu cilongelu cyàbò aci to, bwà kulonga tèlòlòjì wabò awu. Kàdi, Nzambi kumutùma mu cipèèlà, bwà kumulongolola bwà mudimu.

133 Beena dyà Kaayinà kabèèna mwà kukùmbana bwà kulwacisha muntu wa Nzambi nkooci wabò wa butèndeleeedi awu to. Kààdyàkukùmbananganakù to. Ncyà bushùwà. Mònaayi's, munda mwà bikondo.

134 Nènku pàakalwà Yesù, Yéyè kààkakonkakù nànsha umwe wa ku beena tèlòlòjì to, kàdi wàkabàbìikila ne: "Musùmbà wà nyòka yà ntòòkà, anyì nyòka mu bisoosà."

135 Kacya bayiidi kabàvwakù bàpetangana ne dyònsò dyà ku màngumba àbò awu to. Bàvwa ku luseke lwà Abèlè.

136 Kacya Yòzefù kàtukù mwanji kupetangana naabò to. Yéyè ùvwa mukinyiibwe ne mubèngiibwe, bwà kiipàcilà kàmwèkàmwè kàvwà naakù bakwàbò abu aku. Bwalu, Nzambi ùvwa nendè mu mùshindù mutàmbe-mfùkìlu, ne mu mùshindù mushiilàngane ne mùvwàYe ne bakwàbò bwònsò abu awu. Kàdi bàakamukina, kakùyì bwalu to. Kaayinà wàkakina Abèlè, kakùyì bwalu to. Bànà bààbò ne Yòzefù bàakamukina, kakùyì bwalu to.

137 Nènku, leelù ewu, bukwa-màngumba abu, nànsha bwikàle bunène bishi; ndi ntuula cifulu cyànyì ku mutù, ngàmbe ne: "Twasàkidila Nzambi bwà bwalu bwàbò." Kàdi, mu malongesha àbò wònsò manène awu, èkèleeziyà yàbò minène, bintu binène abi; nànsha nànkù, mu byònsò abi, Nzambi ùdi ùpàtulamù bantu bàdi kabàyi naaci bwalu to, bwalu kabààdyàkupetangana ne citàmbe-mfùkìlu to. Ki nkwaka nyéyè awu mumònàngane ne kuya, leelù ewu; ne bwòbò bàdi bàkina nkwaka awu, kakùyì bwalu to.

138 Nânkuumvwa muntu kampànda wàmba dîngà ditùkù, cintu cyàkamba kushintulula mashi àànyì kuàvwija mâyi, bwà kutèèleja muntu wa bwenzeji bwàbûngì, muyiishi munène wa ba-Baptistes.

139 Nènku ùvwa wàkula bwà bwalu abu, ne, kacìvwa cyà mu Mifùndu bwà muntu kukuukwilayè virgò Màriyà to. Mùshindù mwinè wùdìbi bìlelèlà's wè! Ncyà bushùwà. Kwambayè ne kakùvwakù Mufùndu to, bwà kukuukwila muntu nànsha umwe pakuumusha Kilistò. Ncyà bushùwà. Yèyè wàkamba ne: “Nzambì ùvwa munda mwà Kilistò, ne munda Mwèndè mmùvwà kaabujimà kàà Bunzambi.” Ncyà bushùwà.

140 Ne pashìshe, paanyimà pàà dilongesha dyà mu Mifùndu dilenga, ne dyà dikèmà adi, kukùdimuka e kwamba ne: “Kacya kakùvwakù cishimà nànsha cimwè cyenzèke pa buloba to.” Bwalu yèyè ùdi ùbènga dyondopa dyà kùdi Nzambì wòsha ne munu mwiku, kukùdimuka kàdi kwamba ne: “Kacya kakùvwakù cishimà cidì cyenza paanyimà pàà lufù lwà Kilistò to. Muntu nànsha umwe kàtukù mubiishe bafwè to, paanyimà pàà Kilistò, bwalu Yèyè nguvwa Umwèpelè Uvwa ne Mwoyi wà Cyendèlèlè.”

141 Kàdi, ndi nnwàmbila ne, Yesù Kilistò, Mwànà wa Nzambì, wàkambila bayiidi Bèndè ne: “Ndàayi nùkayiishè Èvànjeeliyò; wòndopaayi babèedi; nùbiishè bafwè; ne nùkezulè beena nsudi.” Aci's ke cyàkambilà Yesù bayiidi Bèndè.

142 Mmunyì mùdi bantu mwà kulwa batèndeledi bampofò nùnkù's? Mbalwè ne meeji mabùlakàne bwà mikàlù yà cyena màngumba ne bakìne bânà bààbò, kakùyì bwalu to. Nudi nucimòna anyi? Batàmbe kubùlakana, bakèèpèle bikolè, bàdi bàcyenza bwà luumù lwàbò.

143 Mwambi munène wa mu ditùnga emu leelù ewu, wàkakonkiibwa bwà cinyi kààkapeta dibàtiiza dyà Nyumà Mwîmpè, paanyimà pàà dimané kuleejìbwa kùdi bantu bakwàbò bàà mu cipidì cyèndè, bàvwà bapete dibàtiiza dyà Nyumà Mwîmpe. Yèyè ne: “Mbifwànyine kunyanga mudimu wànyì wà bwambi.” Wèwè mungambile, díbà kanà dyònsò. . .

144 Mbifwànyine kunyanga mudimu wà bwambi wà muntu yònsò wendenda ewu, kàdi kabyàdyàkunyàngakù mudimu wa bwambi wà Yesù Kilistò ùdi ne cyà kwenzeka awu to. Nebitùngunuje bwalu bwà mudimu wa bwambi bwà Yesù Kilistò.

145 Kàdi Mukalenge Docteur ewu kwambayè ne kacya kakùtukù muntu kampànda mubiishìbwe ku bafwè to. Yèyè ne: “Ndi mumanyè ne kùdi musumbà wa bansantu babùnguluki bàà mu malaba mu ditùnga leelù ewu, bàdi bàmba mùdìbo bamòne bafwè babiishìbwe ku lufù. Kàdi,” yèyè ne, “aa! Kakùtukù cijaadiki cyà maalu à mamanya cyà dyondopa kampànda anyi cintu cikwàbò nànsha cimwè to.”

146 Mpindyewu, nudi numòna's, s'ki cyôci eci, mwanèètù wa balùme ne mwanèètù wa bakàji. Ndi muswè nùmonè eci ne ntèmà yònsò. Kabingilà kàdì kènza ne, ke cyôci eci. Leelù ewu, bantu. . .

147 Mu matùkù à Mukalenge Yesù, mu matùkù à Dipungila, pàvwà bantu biitabuuja Nzambì, bààkuumvwa bàmba bwà cishimà kampànda cìvwà cyenzèke, kabààkateetakù bwà kucijaadika ku maalu à mamanya to. Bààkaciitaba. Bààkaciitabuuja cyanààna, bwalu bàvwa bamanyè ne Nzambì ùvwakù.

148 Kàdì, leelù ewu, kasumbù kàà beena dyabùlù kàkaadi kabwelè mu nkwaka yà butèndeleedi amu, ne kàdì kàtamba kuteeta bwà kujaadika maalu bilondèshile maalu à mamanya.

149 Kàdì lekèlaayi ngambe eci, bu mùdici cìfùmina mu Dyulu, mùndì ngiitabuuja, cibwela mu mwoyi wànyì. Kakwènakù cikondo nànsha cìmwè cìdici cìfwànyine kujaadikiibwa to. Bwalu, bu wèwè mwà kujaadika Nzambì, dìbà adi Yèyè kàcyèna kàbìdì mwiitabuuja ku diitabuuja to; aci's ncijaadiki. Tudi twitabuuja Nzambì ne bishimà Byèndè, ku diitabuuja. Tudi tubiikila bintu bìdì kabiyikù abi, bu ne bìvwakù, bwalu Nzambì ngudi mwambè nànkù; nànsha ciikàle cinyì.

150 Abraham kàvwa mwà kujaadika ne mijilu yà mabèèlè à Sarah kayìvwa mifùbidile to. Kàvwa mwà kujaadika ne—ne trompes ayi, ne bikwàbò, yikààvwa miimite. Bwòbò, yèyè ùvwa mwà. . . Kabàvwa mwà kujaadika kantu nànsha kàmwè kàà ku cyôci eci to. Kabàvwa mwà kujaadika pàmwàpa, ku diteeta dyà mamiinu, ne àvwa à imicisha to. Kàdì yèyè wàkaciitabuuja, nànsha bishi, ne wàkabènga cyònsò cìvwà cibèngangana naaci aci, ne wàkabiikila bintu bìvwà kabiyikù abi, bu ne byakadikù. Bwalu, munda mwà cilùlù cikùdika amu, ditèkemenà dyà Nzambì òvwa diikishile pa Dìyi dyà Nzambì, ne kubiikila bintu abi, biikale byà maalu à mamanya any to ne: “Bulelèlè, bwalu Nzambì ngudi mwambe nànkù.” S'ki bwalu mbwòbù abu.

151 Tudi twitabuuja ne ku diitabuuja nkutùdì tucyàkidila. Kàdì bu mwanèètù wa balùme ewu, kabiyi byà kukokangana nendè to, mèmè ncitu ngiitabuuja abi to, kàdì bu mwanèètù wa balùme awu mufwànyine kwikala mubale mùshindù wàkashiibwa Pòlò mabwe e kufwàye, ne bansantu kwimana bamunyungùlùkile ne kusambila too ne pàakaalukilà mwoyi munda mwèndè. Mùshindù wàkayishà Pòlò bufùku bujimà, dilòlò kampànda, kàdì muntu kampànda kupònyè ùmukila ku cibambalu cyà kuulu e kufwàye, nsongàalùme wa citende; kàdì Pòlò wàkateèka mubidi wèndè pambidi pèndè, ne Nyumà wa mwoyi kwalukila cyàkàbìdì munda mwèndè. Mwàkajuulà Eliyà mwànà wa mu dìmòkò wa mukàji kampànda paanyimà pàà yèyè mumanè kufwà, ciine aci mbidimu nkàmà mwandamukùlù kumpàlà kwà Dilwa dyà Kilistò. Bantu, bàà bwalu mene kabàyi ne dibènesha

dyà Nyumà Mwîmpè to, benzè bishimà bìdì bantu aba bàciina bwà kulenga ne Nyumà Mwîmpè. Ekèlekèlè, ekèlekèlè! Byà luse be!

<sup>152</sup> Bwà cinyi? Mbwalu bàdi ne dyambu, ne mbakine bânà bààbò, kakùyì bwalu to; ànu mùvwa Yözefù mukinyiibwe amu, kakùyì bwalu to. Nudi nuciimòna anyi? Yèyè ùvwa mukinyiibwe. Kí ne mbwalu ùvwa mukumbànyine kukinyiibwa nànsha; bwalu, ànu bwà cyanààna cyètù eci. Kabàakamwítabuujà to. Ùvwa musòmbèlè mu cipaapu cishiilàngàne.

<sup>153</sup> Kàdi ndi ngàmba nùнку, mpindyewu, mùdì dîbà dyètù dyènda dîshèèpeketa emu. Ndi ngàmba eci nùнку ne bulelèlè bwònsò bwà mwoyi. Bàdi bàkìna Ekèleeziyà, leelù ewu, udi ne citàmbe-mfùkilu awu. Cintu's mmukawu. Mmukawu ànu wètù wà ciipanshì ewu, s'ùdi munkaci mwà bukwàbantu.

<sup>154</sup> Bayiidi bàakadi naawù. Bàakadyùmvwà bundù bwà kacya's! Bwalu, matùkù dikumi kumpàla, Nzambì wàkabàpèèsha bukolè bwà kwondopa babèèdì, ne kwipata baadémons, ne kujúula bafwè. Kàdi bàvwa ne mwànà wa balùme wa ciseki kumpàlà kwàbò, kàdi kupangilabò. Nènku Yesù, pààkatùùlukàye ku mukùnà aku, ki kondopayè mwànà wa balùme awu. Ki kuMukonkabò ne: "Bwà cinyi tudi bapangile mwà kucyènzà?" Yèyè kàakamba ne: "Ndi—ndi mwangàtùlùle Bukolè bwànyì abu to." Wàkamba ne: "Ndi munùpèèshe Bukolè." Ndi nnùleeja mwaba wàkaBùpèèshaYe Èkèleeziyà, kàdi kanwèna mwà kundeejakù nànsha mwaba ùtùYe muBwangàtùlùle to. Nwamònu anyi? Yesù wàkashindamijila Méyi Endè à kaayi tuseku awu pa cinyi? "Bwà bupidyà bwènù."

<sup>155</sup> Ki pashiishe, ndambù wa matùkù paanyimà, kusanganabò muntu uvwa kàyì mu cipaapu cyàbò cyà butèndeledi aci to. Wàkadi muumvwè Yesù ùshindumuna bintu ebi, ne ùvwa wènza mudimu awu. Ùvwa wìpata baadémons. Ki Peetèlò ne Yone kulwabò bwà kumwambila ne bìvwa bikèngela kwikalayè wa mu kasumbù kààbò bwà cyanààna kàvwa mwà kwenza cyòci eci to. "Nebikengèlè bwà wèwè kutùlonda ne kudiswika pàmwè neetù. Twètù tudi èkèleeziyà, ne bìdì bikèngela ùcyènzè!" Wàkabàfikisha ku dyendela yààbù. Yèyè ùvwa ùdyendela bîmpè menemene kàyì mukadìswike ku bulongolodi bwàbò to.

<sup>156</sup> Pa nàнку, mbyenze ànu bu tumonyamonya tukesè, tutulùmùke, bu tutùdì naatù leelù ewu etu; mmwènenenu mikesè, yà bwànà, yà bânà bakesè, bàalukila paanyimà bàmba ne: "Tudi bamusangane, ne ùvwa wìpata baadémons." Nènku ciwva ncinyi aci? Bàvwa ne mukawu bwalu yèyè ùvwa wènza ciwvabò kabàyi mwà kwenza to. Bàkaavwa bashààle bàà musunya. Mésù ààbò, à luumvu lwàbò, àvwa bu à bânà bààbò ne Yözefù, kaavwa manji kwikala makenkèshiiibwe to, ki kwalukilabo bènda bàmujaana, ne kwambilabo Yesù.

157 Ki Yesù kwamba ne: “Mulekèlaayi.” Amen. “Yèyè ùdi wènza mudimu mwimpè. Ùdi wènza cíMvwà munùtùmine diyì bwà nwênù kwenza aci, kàdi nwênù kupanga kucyènza.” “Nzambi’s ùdi ne bukolè bwà ku mabwe aa kujuudila Abraham bânà.”

158 Nànku mpindyewu, nwênù bânà bèètù bananga ba-Méthodistes ne ba-Baptistes ne ba-Presbytériens, bwalu nudi nwela meeji ne bìdi bikèngela bwà kulwilaci mu èkèleeziyà wenù amu, Nzambi’s ùdi ne bukolè bwà ku bansantu babùnguluki bàà mu malaba aba kujuudila Abraham mabwe. Ncyà bushùwà. Yèyè neàpetè muntu kampànda wíkala mwà kwenza mudimu Wendè. Ncyà bushùwà. Ne dipangila dyàbò dyònsò ne bilèma ne bikwàbò ní mbinganyi, bidìbo bènza abi, s’ki mwàkenza Izalèlèlà cintu cìmwècìmwè aci, kàdi Dimiinu dyàkàne adi dìdi dyènda ditùngùnùka ne kuya kumpàla.

159 Ndi ne disànkà dyàbùngì bwà kwamba ne ndi umwe wabò. Ku ngàsà wa Nzambi, leelù ewu, tudi bàà ku bwòbò abu. Ndi ne disànkà dyàbùngì bwà bwalu abu, kàdi nwênù? Mwoyi wànyì ùdi ùsànkà, ku ntwadijilu wa cidimu cipyacipyà eci, bwà kumanya ne Nzambi, ku ngàsà Wendè udi ukèmesha awu, mmwelè dìnà dyànyì mu Mukàndà wà Mwoyi, bwà kumpèsha dyumvwa dyà ne ndi muswikàkane munkaci mwà bantu Bèndè bàdi badyombòdìibwe abu. Nènku, ne bayiidi, ndi mufwànyine kwamba nùnkù ewu, ndi ncìbala bu dyèsè dyà kutwàla bundù bwà Dìnà Dyèndè. Èyowà’s, mukalenge. Ndi ne disànkà dyàbùngì dyà ne ndi umwe wabò.

160 Nènku mpindyewu tudi tubanga apa ne Yözefù, mu disangisha dyàlondà, dìdi mwà kwikala dilòlò edì anyì mu òmwè dilòlò edì, òmwè, bwalu dìbà dyètù dyàjiki.

161 Kàdi, ndi muMunangè. Kanwènaayikù baMunangè anyì? Yèyè mmulenga wa dikèma. Nènkiu ndi ne disànkà dyàbùngì leelù ewu dyà mùndi mwà kukwàtangana ku byanza ne mulongo wà kàdyàmashindà wà badyombòdìibwe ne babèngiibwe awu, ne bakìnyìibwe kùdi batèndeledi mu ditùnga dijimà emu. S’ki bwòbò aba. Bwòbò ki bàdi bashààdile. Ncyà bushùwà. Batèndeledi, bwà kwakula bwà maalu à buloba, bilondèshile dilonga dyà tùlaasà, ne mu ngaakwilù wa mu nsòmbelu mulenga, mbabàtàmbe. Ne tudi ne disànkà dyà kwikala badìpwekèshe. Bwalu, aba bàdi badìpwekèshe, dìngà ditùkù Nzambi neàlwe musangu mwibìdi, mu Butùmbi, bwà kuzànjika Èkèleeziyà Wendè. Patwàmbà kufika pa dìbà adi: “Tulwanganàayi ne mwètù mwònsò bwà Diitabuuja dyàkafidiibwa musangu ùmwèpelè kùdi bansantu.”

Tùsambilàayi.

162 Mpindyewu ne mitù yètù miinyika, ndi ànu ndikonka ní kùdikù mwà kwikala umwe mu dindà emu, anyì bààbùngì, mùndi ntèkemena, bàtù kacya kabàyikù banjì kwitaba Kilistò ewu, ne mabènesha Èndè manène ne makolè Èndè manène

awu. Nènku tudi munkaci mwà kudikonka, leelù ewu ne, bu wêwè mwà kwenza disungula dyèbè leelù ewu, wamba ne: “Mukalenge Yesù, m’Mémè. Ne ndi njinga kwikala musadidi Webè, ne mwoyi wànyì wònsò, bwà kulonda njila pàmwè ne banyaàbanya badyombola bàà Mukalenge. Ndi mmòna mpindyewu, Mukalenge, kî ncìdì bàà pa buloba bàmba to; ncìdì Bible Webè wàmba. Kî ncìdì bàà pa buloba bàmbiikila to. Bwòbò mbankìne, mwàkakinàbo Yòzefù amu. Mbankìne, mwàkakinàbo Abèlè amu. Mbankìne, ànu mwàkakinàbo Yone amu. Mbankìne, ànu mwàkakinàbo Danyèlè amu. Mbankìne, mwàkakinàbo Yèhezèkèlè, mwàkakinàbo Zekààyi amu. Mbankìne, mwàkakinàbo Yesù amu. Mbankìne, mwàkakinàbo bàpostòlò ne aba bàvwà baKulondè abu, kaküyì bwalu to. Mukalenge, ndi mbàsambidila.”

<sup>163</sup> Kacya nukààdikù bapetè dilabula dyà mùshindù awu, dyúdi mupàtùkemu anyi? “Ne twètù tudi bwakwidi bàà bukalenge, ditùngà dyà cijila, biikàlè tulàmbula milàmbù yà nyumà kùdi Nzambì; mbwena kwamba ne, mamuma à mishikù yètù, àMupèsha butùmbi.” Udiku mufwànyine kwimana munkaci mwà buloba butàcishìibwe ebu anyi? Udiku mufwànyine kwimana kumpàla kwà mfumwèbè wa mudimu awu anyi? Udikù mwà kwimana ne didipwekesha munda mwà mwoyi wèbè, ne dinanga munda mwà mwoyi wèbè, bwà bangènzàmpèkaatù bàà pa buloba ebu, ne Mwoyi wà Kìlistò munda mwèbè, ne kufila bujaadiki ne kutùmbisha butùmbi bwà Nzambì anyi? Wèwè kùyì mwenzè dilabula adi to, bwà cinyì kùyikù mubangè nsombelu wa pa buloba, mwoyi, bintu byònsò cyàkàbìdì, leelù ewu, mu kwela cyanza muulu kùdiYe, wamba ne: “Ndi mpindyewu, Mukalenge, ngiitaba aci, ne muswe bwà Wèwè kumpa dibatiiza dyà Nyumà.”

<sup>164</sup> Mpindyewu, Taatù wetù wa mu Dyulu, Èkèleeziyà mukesè ewu mmwimàne mu dindà emu, tudi bamanyè, muyòbola, mwasa bingoma, mwena lukunà mmumucìncimìke, mmumwàse mikete yèndè ayi. Nènku tudi tulòmba bwà misùùkà yàbò myenji yà mpèkaatù ayi, Mukalenge. Kî mbamanyè ne mbafofomija kùdi nzambì wa buloba ebu to.

<sup>165</sup> Èkèleeziyà, mu kaabujimà, pa buloba bujimà leelù ewu; mulwishi, batèndeledi abu, mbabààse mukete ne mukete wònsò. Kàdi munkaci mwà byònsò abi, ditàbuluja dinène adi didi munkaci mwà kutùngunuka. Binunu byà bàna badipwekeshi, bapèlè, balèngùlùdìbwe mbatetuke babwele mu myaba eyi, ne bamòne cyanza Cyèbè cyà bishimà, mbùle tètè ne Nyumà Mwimpè. Ne kabàcyèna kàbìdì bàà pa buloba ebu to. Mbeena lwendu ne beenyi. Kabèèna bàcyùka maalu à pa buloba to, kàdi bàdi bènda bàkèba Cimenga cicilwalwà, cidì Mwibaki ne Mucyènji mwikàlè Nzambì. Bàmònu bukolè Bwèbè bwà dyondopa, bwà kwondopa babèèdì, bimanyinu Byèbè ne maalu à kukèma byenjiibwa munkaci mwà bantu Bèèbè. Bintu binène ebi bitangàlàke eku ne eku, nànsha mùdikù myaba

yidibo bàbipiisha ne bàteeta kubicincimikila panshi. Basadidi Bèèbè bàdi ànu bàbwelamu ne bàkùtula ditàbuluja, ne bàbweja bapwekèle mu Bukalenge bwà Nzambi.

<sup>166</sup> Munkaci mwètù mu dindà emu, tudi ne dyèsè dyà kwikalakù ne baampàndànjilà aba bàdi bùumuka bàye mu matùnga makwàbò.

<sup>167</sup> Umwe, ùmuka mutangila ku Izàlèèlà. Éyi Nzambi, ki bwalu mbwòbù abu's. Mupòngòlwèle, Nyumà Webè, Mukalenge. Ne swàkù bwà bintu binène byenjiibwè, ne bifikishè beena Yudà bàdi bakwàte ne byà luse abu ku dyalukila. Swàkù bwà bàpetè Nyumà Mwímpè, mwàkenzà baatatwàbò ku cibangidilu amu.

<sup>168</sup> Mwanèètù wa balùme nyéyè ewu ùya mutàngile mu Cuba, ùpàtuka ùkabwela mu bisanga mwàmwà. Wèwè wákamba ne: "Too ne ku bitùpà byà kule menemene byà buloba."

<sup>169</sup> Cintu kampànda cìdi cikoka, cìnyùkusha mwoyi wà bânà bèètù aba. Bàshiya mèkù àbò, bananga bààbò, kabàyi bàcyùka masànka ne bikondo bìmpè byà pa buloba ebu to, kàdi bàya mu malaba àdi kaayi ne bufukè à kwàka amu; mwine amu mmùdi bankàdamana, bàteeta kwimanyika mudimu mene. Kàdi ànu bu ngombe wàkatwàla ditempu adi paanyimà awu, ne mèyi matùma mambula, ne mushèètè wà cipungidi awu, mbashiye bânà bààbò bakesè abu bàdilakana, ne kupwekabo ne njila, bènda bèèla mikunda, bìmba, bàya bapweke ku Lubwebwe.

Tudi tuKusàkidila bwà mwambi yònsò.

<sup>170</sup> Tudi tumòna Mwanèètù John, musòmbe lwà paanyimà mu disangisha dyètù emu, mu dindà emu, kàbidi, mufumìne mu Allemagne. Mùshindù mwine ùdiye mukolèshìibwe, mupèlè's. Mupulùmùnàngàne ne kaaditempu kakesè mu ditùnga dijimà, wènda ùyiisha Èvànjeeliyò. Twasàkidila bwà bwalu bwèndè's!

<sup>171</sup> Ne nsongàalùmè eyi, ne bakwàbò bambi bàdi basòmbe pabwìpì aba, ne beena kwitabuuja bwònsò. Pàngààkonku, Taatù, mwikàle ngiitabuuja ne mu cikondo bu eci ne, mulùme anyi mukàjì yéyè kàyi ne Kilistò munda mwà mwoyi wèndè to, ùvwa kwikala mwele cyanza cyèndè muulu, mu bushùwà, pa kumòna bijaadiki byònsò byà Èvànjeeliyò, bwà ne Wèwè udi umwèumwè awu ne Èkèleeziyà Webè ùdi umwèumwè awu.

<sup>172</sup> Ndi nKwela twasàkidila bwà muntu ne muntu. Ndi ndòmba bwà Wèwè kubàbènesha. Nènku wondopa mibidi yàbò piikalàbo bàsaama, ne bàpèèshèku majinga à mwoyi wàbò. Ènzàku nàнку, Taatù, tudi tulòmba mu Dìna dyà Yesù.

<sup>173</sup> Kàdi ne mitù yètù miinyika, twànjààyi bì kwelangana meeji mu katanci kakesè. Ikàlaayi ànu mu disambila, bitekètebitekète.

Wa kumpàlà ku difwà bwà ndongamu wa  
Nyumà Mwímpè ewu,  
Ùvwa n'Yone Mubàtiiji, kàdi wàkafwà bu  
muntu;

Pashiishe Mukalenge Yesù kulwayè,  
kuMupoopelabò pa nkùrusè,  
Wàkayiisha ne Nyumà ùvwa mwà kusùngila  
bantu ku mpèkaatù.

Pashiishe bààkaasa Stèfanò mabwe, yêyè  
wàkayiisha ùpiisha mpèkaatù,  
Bwòbò, ne ciiji cyà dikèma, bààkamukòsa  
mutù;  
Kàdi yêyè wàkafwà mu Nyumà, kukùùlayè  
mwoyi,  
Ne wàkaya katwilangana ne bakwàbò abu,  
cilwilu cifidi cyà mwoyi aci.

Kwàkadi Peetèlò ne Pòlò, ne Yone wa Nzambi,  
Bààkafila myoyi yàbò bwà Èvànjeeliyò ewu  
wàmòna mwà kukenka;  
Bààkasambakaja mashi àbò, bu bapròfeta  
bàà kale, (Aci's cicidi ànu Dimiinu,  
dikèngèshiibwe.)

Bwà Dîyi dilelèlè dyà Nzambi dyàmòna mwà  
kwambiibwa ne meeji matòòke.

Kùvwa misùùkà mwinshi mwà cyoshelu, yèla  
mbila ne: “Too ne dîbà kaayi?”

Bwà Mukalenge kunyooka aba bàdi benze bibi;  
Kàdi nekwikalè bakwàbò kàbìdi bààfilà mashi  
à mwoyi wàbò

Bwà Èvànjeeliyò wa Nyumà Mwîmpè ewu ne  
lukòkà lwèndè lukünze lwà mashi alu.

Ùtùngunuke ne dizonzesha mashi, èyo, ùdi  
ùzònza mashi,

Èvànjeeliyò wa Nyumà Mwîmpè ewu ùdi  
ùzònza mashi,

Mashi à bayiidi bààkafwilà Bulelèlè abu,  
Èvànjeeliyò wa Nyumà Mwîmpè ewu ùdi  
ùzònza mashi.

<sup>174</sup> [Mwanètù Branham ùdi wimbila mu matàma *Ùdi Ùzònza Ne Mashi*—Muf.]

<sup>175</sup> Éyi Nzambi! Lwàkù, Mukalenge Yesù! Tùfwimbèku mpindyewu patùcidì badipwekèshe kumpàlà Kwèbè apa. Umùshàku dibènga kucyùkà dyònsò dyà maalu mu nsòmbelu yètù, mu myoyi yètù, pàdi ka—kalolo kàà Nyumà kamwèka bu kàdi ne mèsù à meekala apa. Nzambi munkaci mwà kwangata Dîyi Dyèndè mpindyewu ne kuDimyamina mâyi. Tudi ne disànkà dyàbùngì dyà ne Wèwè udi mutùbadilekù, Taatù, bwà kwikala batwàdi bàà Èvànjeeliyò.

<sup>176</sup> Tudi tulòmba bwà dikèngela dyònsò dyà èkèleeziyà. Tudi tusambila bwà mpaasàta wetù munanga, Éyi Nzambi; musadidi wa lulamatu, kàtu ùcyòkakù to, ùtu misangu yònsò ànu



mudilongòlòle bwà kuya. Akùlà ne mwoyi wèndè, leelù ewu, ne àmanyèku ne kùdi difutu dinène dindile kwàka bwà bampaasàtà bàà lulamatu abu pàadisangishabo dyàmwàmwà ku luseke lukwàbò alu pàmwè ne bapikula bwónsò.

<sup>177</sup> Bèneshàku bampaasàtà bakwàbò, ne bampàndànjàlà, ne bidimba byà Mubidi wà Kilistò, myaba yònsò. Tùfwilèku luse ku mapangila ètù, Mukalenge.

<sup>178</sup> Nènku mpindyewu kwòkò dikèngela kampànda mu myoyi yètù, Mukalenge, Kwènàku muswè bwà Wèwè, paÙcidìpu apa, kutùbènèshèku anyì? Kwòkò bubèèdi munkaci mwètù, Mukalenge, swàkù bwà muntu kampànda, udi mubwelè mu èkèleeziyà mukesè ewu leelù ewu awu, ne ùtàngila kwàka ne ùmòna Kàlvariyo, wàmòna mwaba wùdi Dimiinu dilelèlà. Mwaba wùvwà Sàtaanà wèla meeji ne ùvwa mwà kuCibùtula ne lufù awu, kàdi Nzambi wàkaMubiisha ku lufù kàbidi. Kènà ànu mwà kucyènza to! Nzambi mmufile mulayi, ne Nzambi ùtu ùshààla ne mulayi Wèndè. Ne mulayi wónsò mmulelèlà. Wèwè utu mutùlayè Mwoyi wà Cyendèlèlè, ne twètù tudi naaWù. Tudi tuWùmvwa. Kùdi Cintu kampànda munda mwètù, cìkwàta mudimu, citùdi katùyì mwà kuumvwija to. Éyi Nzambi! Munkaci mwà lutàtù, tudi tuumvwa ne Cintu kampànda ncikwàte dyàmwàmwà ne: “Sòmba wèwè ànu mpùwè.” Bipepèlè bikolè bidi mwà kutuuta Dimiinu adi, mazuwà à màyi àdi mwà kutuuta kaabwatù kèètù kakesè aka. Wèwè neùsebè njila pamutù, mwinshi, eku ne eku, anyì munda mwàbù, mùshindù kampànda. Nànku, tudi tushààla beeyemene Diyì, Mukalenge.

<sup>179</sup> Ndi ndòmba mpindyewu ne muntu yèyè ùsaama mu disangisha emu, bwà Nyumà ewu, udi mu nzùbu emu mpindyewu mene awu, upweka mu dinanga dinène, wamba ne: “Mwàn Wanyì, ewu’s m’Mémè. Mémè ndi Taatù Udi mukufùke awu. Mémè ke Ewu Wakatwàla bi—bintu abi mu buloba, bìdi bikwenze cyùdi aci. Sàtaanà ùdi ùteeta kubwela mu mudimu Wànyì. Angàtà mulayi Wànyì, wèwè mwànà.”

<sup>180</sup> Nènku disambila dyà diitabuuja edi dîndi ngenza edi, ndi ngiitabuuja ne Wèwè udi kaaba aka. Swàkù bwà byanza Byèbè, Mukalenge, byòbokelè mwoyi ne mwoyi wónsò, ne bubèèdi buumuke pambidi pàà bantu. Ndi ntàndisha dyabùlù; dyabùlù wa dicincimikiibwa, dyabùlù wa diciina, dyabùlù wa disaamà dyà mùshindù wónsò awu. Wèwè udi mwambe ne: “Mu Dîna Dyànyì bwòbò nebìipate badémóns.” Mu bwobùmwè bwà èkèleeziyà ewu, ne Nyumà ewu mu dîndà emu, tudi twipata bubì bwónsò kùdi bantu; bwà tùmukè mwab’ewu, bakezùke, ku Mulàmbù wà Mukalenge Yesù, patùdi tuWitaba ne didìpwekesha dyònsò apa.

<sup>181</sup> Tùbènèshèku mu midimu yicilwalwà ayi. Tùbènèshèku mu cyònsò citùdi twenza aci. Ndàaku ne bambi ne batangadiki

ne bampàndànjlà, ku myaba yàbò, Mukalenge. Enzàku bwà ditùkù kampànda twatwilanganà ku—ku makàsà Èbè. Dìbà adi netùteekè byètù bileeji byà bucimunyi paanshì. Nzambi, nebiikalè bàà mîshindù yònsò. Nèkwikalè muntu mutòòke, muntu wa kalaabi, muntu mufiike. Bwònsò cyàpàmwè, netwàmbè ne: “Mukalenge, mbwòbò aba.” Nditùkù kaayi dyà dicyònkomoka diikalàci’s wè! Tùkwatàayi mudimu pàdì ditùkù dicìkàlekù, bwalu bufùkù bùdi bùlwa bùdì muntu nànsha umwe kàyì mwà kukwàta mudimu to. Tudi tulòmba mabènesha aa mu Dìnà dyà—dyà Mwànà wa Nzambi munanga, Yesù Kilistò. Amen.

Bintu byònsò bìdi mwà kwenzeka, itàbùùja  
nàka;  
Itàbùùja nàka, ànu . . . (Ncinyi ciinè aci?)  
Bintu byònsò bìdi mwà kwenzeka, ànu . . .

<sup>182</sup> Mbanganyi bàvwa ne dijinga kampànda, ne bafwànyine kwitabuuja mpindyewu mene? Nudi mwà kwela cyanza muulu, kwamba ne: “Mpindyewu ndi ngààkidila.”

Mpindyewu ndi ngààkidila, mpindyewu ndi  
ngààkidila,  
Bintu byònsò bìdi mwà kwenzeka, mpindyewu  
ndi ngààkidila;  
Mpindyewu ndi ngààkidila, mpindyewu ndi  
ngààkidila,  
Bintu byònsò bìdi mwà kwenzeka, mpindyewu  
ndi ngààkidila.

<sup>183</sup> Mpindyewu twìnyikàayikù ànu mitù yètù bwà katanci kakesè cyanàànà mpindyewu. Tùngunukà wèwè ànu cyanàànà, mwanèètù wa bakàji, ne kwimba pyànò, bu wèwè mwà kuswà. Udi uMwakidila anyi?

<sup>184</sup> Wèwè udi wamba ne: “Mwanèètù Branham, nkàadi musaamè kùkaadi cikondo kampànda. Kùdi cintu kampànda cimweka ànu bu ne ncyèna mwà kucimuna nànsha. Bàkaadi bansambidile, kùdi bantu cyakaa.”

<sup>185</sup> Abi’s mbîmpè, mwanèètù wa balùme, mwanèètù wa bakàji, kàdi ukàadikù mwelè meeji ne ncinyi ciinè aci anyi? Mmulayi mukesè wàkakupabo awu. “Bintu byònsò bìdi mwà kwenzeka bwà ewu udi witabuuja.”

<sup>186</sup> Kwènakù ànu mwà kwimansha aci ku Kàlvariyò mu dindà emu anyi? Shààla ànu mukwàte ndekeelu waci awu kaaba aka, Nyumà udi ukupèeshaci awu’s. Cyèlè ànu ku Kàlvariyò, wamba ne: “Ki lwongò lwànyì lùdì lukwàte lwàlwa. Mpindyewu ndi ngààkidila, mpindyewu mene. Nkumanè kujika, mpindyewu mene. Cìdì cyenzèka nànsha ciikàle cinyi, mpindyewu mene lwongò lwànyì ndukwacile munda mwà cilùlù cikùdika, ne ndi ngààkidila ànu cìmvwà mulòmbè. Ndi mumanyè ne ndi naaci. Dìyi dyà Nzambi ndidì dyambè nànkù. Nènku, Nzambi,

ndi nKutàngidila mpindyewu.” Pámwápa wêwè uvwa ne tunynganyinga, ntàtù yà mfranga, ní ncinganyi ní ncinganyi. Nànsha ciikàle cinyi, cikupe cikadikume ku Kàlvariyò.

Bwalu bintu byònsò—bintu byònsò bìdi mwà  
kwenzeka, itàbùùjà nàka.

<sup>187</sup> Cìlekèlaayi cìbwelè cìtùkinè, ne kalolo kwònsò. Kí mbilenga bilayà anyi? Eci’s ki cyànyì cikondo cyà disangisha. Dìyì dyámányì kukùnyiiibwa, nudi numòna’s, mpindyewu Nzambì ùdi munkaci mwà kuDìmyamina màyi. Kanwènaayiku ànu mwà kuumvwa aci ci-. . .mùdì aci cìpòlobeja, cìfila cyashima cyà mu Bwikadi bwà Nzambì, ànu bwènda bùpweka, buCìmyamina màyi, bwàmba ne: “Mpindyewu, apa, mwanàànyì, ndi—ndi ndwa ne Dìyì Dyànyì. Ndi ntwa Dìyì Dyànyì mushinga. Ndi nDitàbaleela, muunyà ne bufùku, ne Ndi nDìmyamina màyi mpindyewu mu mwoyi wèbè. Kwènakù ànu mwà kuNgangata ne kuNgiitabuuja anyi?”

Bwalu bintu byònsò (Cinyi?) bìdi mwà  
kwenzeka, itàbùùjà nàka.

<sup>188</sup> Ekèlekèlè! Bilenga kaayi’s wè! Bilenga kaayi’s wè, kubwela ànu kutùkina cyanàànà, bwà kuumvwa màyi mùdìwu àpweka pa Mamiinu’s! Ncinyì aci? Dimiinu dyakàne, Ndikùnyiiibwe munda mwà mwoyi wèbè. N’Dìyì dyà Nzambì. Ke Dimiinu ndyòdì adi’s. Ki Nyumà Mwímpè nyàwù. Dimiinu dyàkalaya Nzambì ku cibangidilu adi. Nwènu nudi Dimiinu dyà Abraham, mu kwikala bafwè mu Kilistò, ne kwangata Dimiinu dyà Abraham, ne biikale bapyànyì bilondèshìle mulayi. Nyumà Mwímpè mmufùmìne ku Dimiinu dyà Abraham, didì dìnùvwija bânà bàà balùme ne bàà bakàji bàà Nzambì adi.

<sup>189</sup> Mpindyewu, aci ke Nyumà Mwímpè munkaci mwà kumyamina màyi pa mulayi ùdì ufùma ku dyangata katanci aka awu, bwà dyondopiibwa dyèbè, bwà lupàndù lwèbè, bwà lwendu lwà lutàmbe bwímpè, bwà bwòwà kuumukabù, bwà cyònsò cyùdì naaci dikèngela aci; bwà lwendu lwà kuya too ne ku bisanga alu, bwà lwendu lwà kuya ku buloba bwà beena Izàlèlèlè abu; ku èkèleeziyà webè, kwèbè kumbèlu, ní mpenyi ní mpenyi, too ne kwèbè kumbèlu aku. Ki Nyumà Mwímpè awu wàmba ne: “Awu’s m’Mémè. Mémè ndi neebè. Tùngunuka. Ndi ndombola njila. Wêwè, tùngunuka wêwè ànu ne kwenda kuya. Ki Mémè awu.”

Kùdi Bwìcì mu Lubwebwe bwèbè wêwè;  
Shiya mpèkaatù webè bwà Mashi  
kumubwikidija,

Kùdi Bwìcì mu Lubwebwe bwèbè wêwè.

Tudikù mwà kjuukila kuulu’s.

Kaa, patukà mu mìsèèsù ne ku njila,  
Yiishà Dìyì. . .(Udikù ne bwalu kampànda  
bùdì muswè kwamba anyi?)

Ambilà mwanèètù yònsò udi mudishinde awu  
ne:

Kùdi Bwíci mu Lubwebwe bwèbè wêwè.

Kaa, kùdi Bwíci mu Lubwebwe, mwanèètù wa  
balùme.

Kùdi Bwíci mu Lubwebwe bwèbè wêwè;  
Shiya mpèkaatù yèbè ayi bwà Mashi  
kuyìbwikidija,

Kùdi Bwíci mu Lubwebwe bwèbè wêwè.

<sup>190</sup> Mpindyewu, tàngilàayi, ncyèna muswè bwà nwènu kwanji  
kuumuka to. Ndi muswè bwà wêwè kumòna muntu kampànda  
udi mwimàne pabwípi neebè awu, umulabùle ku cyaanza,  
wamba ne: “Nzambi àkubènèshè, mwanèètù wa balùme,”  
anyi mwanèètù wa bakàji, nànsha yéyè nganyì. Kùdimukà  
ànu cyanààna. Ewu n’tabernacle mukesè wa kale wa kàyì  
ùsungulujangana bilondèshile màngumba nànsha. Tudi ànu mu  
lwendu lwètù, bantu bàà pabwàbò. Éyo.

Angàtà Dìna dya Yesù wèndè naadi,  
Mwànà wa kanyinganyinga ne dikènga;  
Nedikupè disànkà ne busàmbi,  
Nda naaDì kwònsò kúyaaya.

Dìna dya mushinga, (Dìna dya mushinga  
mukolè!) Éyì dya bupòle be! (Éyì dya bupòle  
be!)

Ditèkemena dya buloba ne disànkà dya Dyulu;  
Dìna dya mushinga, Éyì dya bupòle be!  
Ditèkemena dya buloba ne disànkà dya Dyulu.

Mpindyewu bantu bwònsò tàngilàayi mu nùнку mpindyewu.

Twinamina ku—ku Dìna dya Yesù,  
Tupòna mikookwela ku makàsà Èndè,  
Mfùmù wa bamfùmù mu Dyulu netùMwasè  
cifulu cyà butùmbi,  
Pààjika lwendu lwètù.

Dìna dya mushinga, (Dìna dya mushinga  
mukolè!) Éyì dya bupòle be! (Éyì dya bupòle  
be!)


Ditèkemena dya buloba ne disànkà dya Dyulu;  
Dìna dya mushinga, (Dìna dya mushinga  
mukolè!) Kaa dya bupòle be!

Ditèkemena dya buloba ne disànkà...  
(...?...)

<sup>191</sup> Mpindyewu patùdi twinyika mitù yètù kùdi Mukalenge Yesù  
apa. Cìvwa cibilù cinènè cyà cyanga, difestò dinène, difestò dya  
mpenta pa Dìyì ne bintu byà Nzambi, pa Nyumà Mwímpè Wèndè.  
Tudi baswè kulòmbela bânà bèètù bampàndànjlà bàyaaya  
mu budimi aba mabènesha à Nzambi bwà mpindyewu, bwà  
Nzambi àbàsake lubilu buludì. Tudi tunùlaya; netùnùsambidilè,

mwanèètù wa balùme, ne mwanèètù wa bakàjì. Bakàjì bààbò, bananga bààbò, elààyìbì meeji cidì bakàjì abu bàpicila. Ndi mumanyìne, ku mukàjàànyì sungasunga.

<sup>192</sup> Ku bampaasàtà aba, Mwanèètù Jackson, ne—ne ngèèla meeji ne Mwanèètù Beeler udi paanyimà pààpa wàwa, ne bààbùngì bakwàbò bàà ku bampaasàtà. Teddy udi paanyimà apa ewu, mwambi wa citende. Bakwàbò bààbùngì bàdì kaaba aka abu, tudì ànu tulòmba mabènesha à Nzambi's. Mwanèètù wa balùme mutekète kaaba aka, wa ku èkèleeziyà wa Nzambi kwaka ewu, utùdì ne cyà kumòna mu mapingaja emu. Tudi tumulòmbela mabènesha, mmutangadiki, ngèèla meeji ne mmwômò. Kì mmwômò anyì, mwanèètù? Dìná dyèbè nganyi? [Mwanèètù wa balùme awu ùdì wàmba ne: “Morgan.”—Muf.] Mwanèètù Morg-... [“Morgan.”] Morgan, Mwanèètù Morgan. Ndi ànu ne disànkà dyàbùngì dyà kwikalakù naabo bwònsò kaaba aka's!

<sup>193</sup> Nènku, mpindyewu, patùdì twinyika mitù yètù kùdìYe mpindyewu apa, ne tutàngila apa. Nyèwù kùdì mwanèètù mutekète mupwekèle mwimàne lwà mu ndekeelu mwà nzùbu mwàmwa. Ùdì ùpulumuna kaaditempu kakesè, mùndì mumvwè, ùkòsolola mu ditùnga dijimà emu. Bààbùngì bàà kùdìbo mbamumanyè bu “Mupròfeta John.” Tutu tumubiikila ne “Mwanèètù John,” munwemu emu. Mwawa misangu yònsò ànu ne kaneemu bwà muntu awu. Kàdi, dǐngà ditùkù mwawa mubande mukasàmbe bàmwè bàà ku balundà bàànyì, awu's mmwanèètù wa balùme...Mwanèètù wa bakàjì Jimmy O'Neal, lwà ku Sellersburg kwàka. Awu's mmuku wa Mwanèètù wa balùme ne Mwanèètù wa bakàjì Green. Bàdì kaaba aka mu dindà emu. Nènku Mwanèètù John ùvwa mu nzùbu mwàbò, kàdi kungambilabò mùvwàye mwena Kilistò mulelèlè ne mukàlàngà. Ne bwòbò kumpèesha nsòmbelu wendè, wà cìvwàye mubàmbile aci, ne mwàkadiye mupicile mu mateeta makolè. Ne yèyè mmupicile mu njila mukolè. Nènku netùmulòmbè, mu dindà emu, bu yèyè mwà kutangalaja disangisha edi, ne kulòmba dibènesha dyèndè kùdì Nzambi, pa disangisha edi. Udikù muswè bwà kutwènzela nànu awu anyì, Mwanèètù Johnny? Panùdì bwònsò biinyike mitù yètù apa. Nènku, Mwanèètù John, bu wèwè mwà kutùtangalajakù mu disambila. 

56-1230 Yòzefù Ùtwilangana Ne Bàna Bààbò  
Branham Tabernacle  
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)